

匏翁家藏集

匏翁家藏集卷第三

詩三十五首

贈金朝瑤

向晚暑氣清有客扣我戶褰裳起迓之聆語若平素似諳姓與
名欲問或恐誤客言君豈忘坐請為君訴未及三兩言拊掌頓
驚悟憶當景泰初寬也年尚孺鼓篋郡庠間已解親外傳君時
從舅氏來向官下住同登訖菴門講業日相聚歲久君乃歸浙
水舟獨泝屈指別來年已過二十數兩地無尺書居常但瞻慕
相見不識君顏色已非故不知今何為乃有此奇遇君言自別
來雲路殊窘步五試于有司曾未合尺度及茲邑大夫而以我
充賦老母今在堂白日迫遲暮祿仕求養親學職今乃作邵武
亦名邦有任於此赴天假便道還一拜先人墓其餘衷曲情請

俟更僕布我聞君言已流涕發喑啞動如參與商古語今始寤
感君昔善交蒙子今在顧我欲贈子行金玉不足富內廷達外
邑坦坦皆仕路與子游其間願各勤保護倘為同門羞適取舉
世惡修德崇今名他年有良晤

寄題陽山澄照寺

今威稟僊骨化鶴去遼東傳聞有遺井乃在青山中山深草木
盛苔徑誰能窮爰有釋氏子於此構蓮宮殿閣頗雄傑林杪見
青紅高厓石色古小洞雲氣通神龍室其地上下雨兼風歲時
郡長吏祈禱屢年豐我昔過東麓落日明丹楓所恨足力弱徒
然望龍嵒何時躡其巔歷覽無忽忽回頭發長嘆深愧南飛鴻

送林一中福建僉憲

蹇劣無外慕中歲偶成名束帶趨闕下獲侍君子行弱水限瀛

洲明星垂貫城蹟異雖懸隔心同常合併拙性素寡諧有蓋非
徒傾乃叔寔嚴師令兄況名卿而我師事餘久矣孰芳聲方深
追倍樂俄動睽違情 朝廷得一相賢者宜同升端如孤鳳起
鶴鵠相和鳴八閩連百粵城郭三山橫此中持憲節海波會澄
清同朝再有日超遷當政成

題鄭郎中所藏張師夔畫

師夔畫好不可誣筆法頗似崑山朱未論人品高與下胸次自
是吞江湖平林絕澗雲模糊深處自有哀猿呼青苔細路絕人
蹟遇着卽是漁樵徒忽然空翠落衣袖崇山峻嶺相縈紆丹梯
百尺通玄都僊冢茫茫還有無弱質本是山澤癯見此不覺掀
長須卧游三日猶不足王維輞川無此圖題詩却問鄭大夫此
圖應着千金沽

贈別丁鳳儀刑部

我昔白下逢丁儀，黑漆點睛玉琢頤。相看不用道名姓，開口一笑先談詩。君詩不作宋元語，開元大曆相追隨。雖云專師李與杜，亦或下友參兼維。其餘佺期之問輩，茂視何異群小兒。于時場屋文最盛，君獨事此將安爲。譬資章甫適於越，越人斷髮無用之。我方一倡已自誤，君復累和爲人嗤。涼秋八月桂花發，多士競赴鄉闈時。臨風再作老婦舞，鹿鳴接席元無期。鳳皇翩翩起千仞，先後瓊林棲一枝。玉堂載筆我甚愧，烏府閱獄君無疑。燕南二月草芽綠，君忽捧檄東南馳。張家灣頭買大舫，官河三日冰流漸。南都作官殊可樂，故宅況在秦淮湄。清晨出門了公事，薄暮還家及我私。北堂阿母年七十，蕭然兩鬢縈游絲。入房喚婦出，共具祿米作飯甘。如飴人生作官有如此，清如伯夷安

肯辭更憶南都北城外此地乃爲少昊司太平堤長二里許馬
蹄緩緩鞭垂垂鍾山削翠幾千仞影向玄武湖中窺水光山色
兩奇絕飽看未覺詩腸飢尋常馬上得佳句封題寄我當休遲

送盛訓術還吳江

一舸東南去望望故里門夕陽煙市影秋水雪灘痕製藥當書
案彈琴罷酒尊相過官舍裏應是史西村

挽張征西

漢室論諸將行邊許衛青征西憑豹略逐北至龍庭閉戶功名
遂環營涕淚零千秋元不死麟閣儼儀形

送同年黃敦實知玉山

懷玉山中路煩君此一行官因科第重人比縣名清黃霸終京
兆言游暫武城亦知離別易杯酒不須傾

送王合州

南出都門去逢人問合州一官為別駕萬里付扁舟巫峽沅泉
曉峨眉片月秋緣知蜀道易隨處有詩留

送劉寺正約之江西審刑

天子齋居罷舞雩使臣承命出皇都朝端法吏誰為最江右冤
民自此無兩脚隨車應不斷麥苗蔽野未全枯漢庭治獄多超
擢拭目看君立要塗

為安福尹仁器紀善追和祭酒李文忠公所遺之作

先生去作泉臺客瀘水悠悠歲月多太學舊規三舍在中朝清
節幾人過斯人有感空臨楮後輩無能也掇科欲寫和章頻不
就玉堂踈雨墨重磨

中秋夜飲陸廉伯西齋

到手金杯且慢斟，小齋一醉夜沉沉。
關山未覺分南北，人月何須論古今。
水落蒹葭應自老，秋來蟋蟀爲誰吟。
不知霜露沾衣處，偏是詩家感慨深。

送同年簡齊道歸省

春半相逢在禮闈，題詩忽復送君歸。
盧前名姓慙楊炯，洛下文章見陸機。
曉日攀龍恩似海，秋風躍馬去如飛。
新年草色知人意，應向階前映綵衣。

題青州先賢祠

汴宋人才無古先，東方作郡總名賢。
朝廷擇相多從此，州縣勞人豈信然。
隱隱故疆分海岱，堂堂遺象照山川。
只今新廟煩虛位，莫道前脩美獨專。

林良鷺鷥圖

上有白頭翁鳥

風吹碧蘆灣蘆葉何飄蕭幽禽止其下愛此波迢迢意態殊容
與羽翮仍逍遙飲啄旣得所有食誰能招附人慚鷹隼巢林笑
鷦鷯何彼白頭鳥向我聲嘒嘒陋哉里巷語此意奚足描功名
及成遂祿位期侈驕白日不廻駕冥行到中宵馮車一引首始
知路非遙鄙夫復眷戀顧乃嘆無聊誰爲去此鳥勿使污輕綃
荀入畫來

岳蒙泉畫葡萄

曾是文淵閣下才才高只合有人猜白頭騎馬涼州過却使葡
萄入畫來

贈地理家二首

平生兩屐共扁舟南過荆門北冀州著得文章填破篋翻嫌司
馬是空游

萬里江山一覽中已堪藉手謁諸公儒先縱有山陵議恐與君

家意不同

壽席道士

白頭一羽客何處曾相逢月下老翁并雲間玉女峰
蹠蹠還似鶴變化真猶龍試問渠年紀山中有古松

題畫

誰持畫障索我歌見畫如向江南過扁舟坐我順流去兩岸不
斷山嵯峨山中老樹青婆娑雲深難辨枝與柯渺然一片漾微
白千頃平湖生遠波想當若人作此畫墨汁如雨流滂沱夕陽
落盡板橋上何彼行客偏麼我生固有山水癖猶道圖畫傳
來謔昨朝騎馬出城去看山直到燕山阿千巖萬壑青不了較
之江南山更多長溪淺渚舟如梭亦着漁翁披綠蓑青鞵布韞
不曾辦馬背未必愁坡陀若非塵鞅縛人住山水佳處須行窩

題詩自笑徒吟哦佳哉此圖如我何煙江疊嶂寫長句我亦年
來嫌老坡

松江鄧節婦二首

夫亡朱是苦能禁一水纔知節婦心不信臨邛新寡者向人偏
賦白頭吟

節婦名高誰與齊眼中覺得九峰低直須二字平生盡貞烈宜
從卷首題

送金德潤主事改選南京便養

清曉辭朝去離顏帶笑歡但知因養母不道是之官路指桃花
渡衣衝麥秀寒鍾山如有待江上作龍蟠

送李侍郎致仕歸博羅

白雲渾不礙羅浮望盡家山南海頭暮景迫人陳短疏春風吹

髮上扁舟臣於社稷當爲悅身在江湖亦有憂此日都門稱嘆者品題先入二疏傳

追送張尚質戶部兼懷沈仲律主客

秋風騎馬向南行送別深慚句不成顧我只如前日懶思君應比後湖清朝回曉月當瓊島夢逐春潮到石城遙想齋居無俗客相過多見沈雲卿

翰林齋宿

迢迢清夜宿詞林不是西園口賞心天上星辰華蓋近海中煙霧玉堂深話長絳蠟頻銷燭夢短青綾獨擁衾明日慶成何以獻願同張耒賦當今

又次費廷言韻

月滿蓬瀛樹影涵並游僊館不勝慚歐陽白戰多詩禁周澤清

齋厭酒酣兵衛森嚴環闕下神光隱約起郊南玉墀春宴明朝
事載望 君恩四海覃

慶成宴二首

玉陛東頭第一筵坐分春色愧群僊詩題共和篇三百酒價無
論斗十千曲舞羽衣齊作隊花簪金字巧成聯卷阿鳴鳳今重
覩定協周家舊卜年

閣門傳 詔下瓊筵許傍文樓坐列僊鳳曆紀元初滿十玉杯
稱壽定過千頌鍾應律歌工起階楯成行衛士聯旣醉小臣思
寸補擬書無逸獻新年

上元夜戴中書宅賞燈

南客相逢惜此宵燈詞酒令破寥寥莫教隱几生春夢就可聯
鑣去早朝月色漸臨青瑣闥風光多在玉河橋休文不赴斯文

約應是嗔人折簡招

時沈廷美不至

脩竹仕女圖

曾讀杜甫佳人篇佳人今向畫圖傳
練裙縞袂春風裏不減花神并水仙
牽蘿補屋居空谷日莫依然倚脩竹
只隔西鄰短短墻楊花榆莢紛相逐

白雲僊女圖

霞裙霧帶空中起何物嫣然一僊子
下方塵土不沾衣來往踏雲如踏水
瑤池西去扶桑東萬里聊乘半日風
却笑洛神波底住一生空卧水晶宮

爲周評事題沈石田畫二首

芙蓉

憶涉秋水曾采芙蓉花花邊蕩槳
白日暮美人不見令人嗟

秀色天然淨如洗，依舊幽花照江水。高堂四壁起秋風，不是丹青那得此。周卿愛此如愛蓮，胸中風月元無邊。慚余未擬愛蓮說，爲君且賦芙蓉篇。

芭蕉

老卉呈嬌紅破葉，留故綠正當零落時。對此殊不俗，我思石田生秋色。填滿腹腹中抑鬱無柰何，信手寫之忽盈幅。滾滾白露初爲霜，苔花冷蝕山骨蒼。眼昏錯道逢僊子，綠絲步障紅綃裳。

送張都水

幽燕建都邑，九鼎從而遷。八政一曰食，仰此東南偏。歲漕四百萬，舳艫相後先。雲帆罷轉海，江淮達且沿。迤邐經齊魯，有渠昔人穿。噫！此尋丈耳，譬若溝澮然。置牖以啓閉，相時爲節宣。巖巖魯山下，平地多流泉。泉流入漕渠，其始纔涓涓。齋淪惟自足，安

知可浮船疏導非人力濟世嗟何緣張君官水部治水思昔年
往來相度之滌源同九川功成既歸朝大臣慕其賢封章始朝
薦行李仍夕旋維此百泉眼利博人爭傳入渠有餘瀝可溉萬
頃田只今東方民老幼咸顛連槁項與黃馘嗷嗷口流涎潴洩
倘有策阜澇何須憐漕粟國用足種粟民生全他年司馬氏載
入河渠篇

初夏雨霽

好雨夜來過朝陽散新晴朝回一解帶偃仰向南榮焚香遣塵
慮讀書悅道情屋角槐初綠時聞好鳥鳴誰知城市裏心境有
餘清

--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--	--

鮑翁家藏集卷第四

詩三十二首

賦黃樓送李貞伯

維河有源星宿同導河積石思神功濁流汗漫失故道積石却
與澶淵通平郊脫轡萬馬逸一夜徑度徐州洪徐州太守蘇長
公夜呼禁卒登城墉一身未足捍大患豈無木柵兼竹籠戲馬
臺旁二十里有隄橫亘長如虹高城不浸三版耳挽回魚鰲仍
耆童防河錄成天有工黃樓高起城之東五行有土可制水底
用四壁塗青紅太守登樓賓客從舉杯酌水臨長風河伯稽首
受約束不敢更與城爭雄水流滔滔向東去紆徐演漾殊從容
負薪投壁竟何用漢家浪築宣防宮自公去後五百載水流有
盡恩無窮我生慕公公不逢安得置我茲樓中穎濱淮海獨何

幸留得兩賦摩蒼穹鳳池舍人今李邕南行別我何忽忽登高
眺遠必能賦封題須附冥飛鴻

少詹事柯公挽章

莆陽山水邑文獻代相仍詹也唐時有襄于宋室稱惟公從後
起餘子讓先登科甲直能冠詞鋒莫敢膺進言希祖禹紀事到
吳兢已向經筵入元從史館升肺肝求主識氣力待誰憑慎
密中無罅方巖外有稜副君資講讀胄子要師承縷服終難
奪綸書遠自徵迺中翻報計都下盡喧騰夏屋梁驚折長河岸
善崩幾年儲宅俊他日曠疑丞當宁徒前席斯文失右肱人言
猶悄悄天視故僂僂卹典恩光下哀歌韻語興嘒子生旣晚爲
彼役無能久候儀庭鳳焦思出壑氷竹根巖月落荔子海雲蒸
公起當何日高呼恨不膺

竹巖公號

送姜用貞赴南京刑部因懷項文祥

南去分司畫省郎行行因得奉高堂已如毛義爲人子早向宗
元識吏商春草訟庭稀獄案碧山官舍有書牀項斯別後年華
改爲謝無詩遠寄將

與諸友東郭草亭看牡丹二首

曾是平章宅裏花賞時還在故侯家帝鄉況有此亭古人世
但知今日嘉吟興待生滄海月醉顏驚見赤城霞風流前輩凋
零盡欲覓遺蹤事已賒

背郭林亭風物幽綠陰時節更須游獨憐芳草容人卧多謝名
花爲客留錦水築堂從杜老漆園成器想樊侯暮春未許山陰
占今日燕南襖事修

次韻李賓之病暑

時閏六月

夏暑亦常事江南未宜歇維此曰朔方氣候無差別洞庭碧汪
洋太行青巖巢遙思蛟室空豈畏羊腸折對食七或喪解衣帶
翻結頗聞上古時處野復居穴宮室始湫隘文字非漫滅雖云
蔽風雨重我此炎熱連朝常旣焚未夜忽庭蕪風詠鑿冰月
令紀乘驢彼日故遲來斯言自高揭四序功成退三王世興迭
祝神司夏令一月真濫設將行衣未裝旣醉醜還酸發狂果大
叫排悶得深悅貧者衣裳單所慮窮冬節露脛與踣躄赤脚寧
蹉跌暑氣任蒸人吾生況江浙

曰昌黎清節廟

君臣有大義誰獨能廢之雖云行天罰有責安可辭南巢到牧
野此事已再爲彼動固以時我義亦自持所以周家粟不及首
陽薇飄然脫屣去鴻鵠青冥飛維昔能讓國去周固其宜馬遷

執史筆歌我安適歸我歸既無所無乃非怨詞藉有穎濱叟刪
潤庶已知二子百世師邦人詎能私要之天壤間郡當置一祠
請觀昌黎頌奚假吾聲詩

苦雨

入夏憂不雨雨甚亦可憂幸此米價減宿麥且有收人情稍覺
舒天意復見尤一雨過三日其勢殊未休九市成九河可車翻
可舟比屋垣墻倒汎汎宅載浮婦女出大叫兒童誇善泅又聞
城西偏水患更不侔一家三壓死傷者恐不瘳事急欲走避有
足誰家投聞之是叵忍援之猝無謀我欲作天問問此來何由
但恨此來時在天少遲留往夜東門火平明失其樓雨來火不
作火滅雨乃流漢儒傳五行箕子叙初疇人邇天亦邇此理或
可求賦詩遣孤悶廢卷發長謳因之望遠海安得登高丘

送蔣蒲州

郎吏紛紛填仕途，初試幾人爲大夫。如君本是青雲器，有身豈合居江湖。山右大州稱古蒲，手中新分太守符。昨聞州人告荒歉，衆口待子歡且鋪。進士中人不流俗，設施肯作科名辱。黍稷豐登鷄犬寧，聊以茲行遂民欲。宣武街頭車已裝，乘此十日秋風涼。青天眉宇太行秀，平野襟帶黃河長。州中父老出郊迓，來日太守登公堂。

送蕭漢文分司清江浦

誰云何遜在揚州，只到淮南便艤舟。東閣官梅千古事，小山叢桂一時秋。考工有記煩開卷，都水成功屬運籌。浦口相過曾訂約，錦袍須共月中游。

送吳憲之知龍泉

爭愛江東孤鳳凰南飛浙水見文章從來民事偏為重此去科
名定有光燕寢焚香稀案牘春郊騎馬徧耕桑長安極北誰云
遠要聽成人頌蟹匡

送文宗儒知永嘉

用唐人方干送王永嘉韻

同年出宰聯翩去大邑爭誇浙水東選士初行常法外期君當
在古人中竹房夜照江心月柳浪朝翻海面風此地從來詩景
勝還聞拔擢論民功

送項崇仁知建陽

高步賢科衆所推筆端文字豈無施已看作令如龐統不待逢
人說項斯千載宋儒真可學一時秦吏謾為師公餘為我尋遺
蹟應踏扁舟入武夷

贈釋子芳草堂

出吳閶門走山塘山塘北去七里長平郊崛起虎丘寺雲樹一
簇攢青蒼我昔家居絕塵事兩足只有登山忙扁舟搖搖掠岸
去尋奇探勝時徜徉舍舟登岸縱所適四尺古墩當道傍道傍
父老說遺蹟劉公佐邑殊循良邑人此地曾拜送相與聚土示
不忘我欲題詩紀其事碑亭淡淡餘殘陽翛然欲去更回首忽
見側畔依僧坊青松夾道蔭寺額大書金字何煌煌竹陰蕭然
槿花舍中有丈室并廻廊一從京師住三載東南引領徒相望
旦朝忽有僧來謁自言來自胥臺鄉吾師出家修苦行吳下知
名芳草堂今年新領祠部檄劉公墩邊開道場敢持絹素乞一
語南還留作山門光嗟哉後世重異教三吳尤云熾而昌穹樓
傑殿塗金碧直以壯麗充緇黃其間號稱彼善者屈指一二無
留藏白雲寺建爲范老表忠觀改因岳王只今此寺雖儉朴寺

名却爲劉公彰此墩可夷碑可仆有僧世守庸何傷投簪還鄉
會有日便擬入寺尋支郎舊時詩句如可補坐我草堂焚妙香

凌季行家賞蓮

盆池當坐長新荷眼底西湖渺綠波便可乘舟如太乙依然臨
水散東坡碧簫涼露先秋下華屋香風向晚過酒客不勝金谷
數對花聊賦醉時歌

和沈廷美次前韻

重把清尊對碧荷醉來激水作圓波誰移東海紅雲島絕勝西
山玉雪坡花底佳篇慚我和門前俗客任渠過晚涼身在江湖
上唱出漁郎款乃歌

陸文量職方新居讌集分來字韻

士龍宅裏小筵開坐對春風拂檻回未許持杯稱酒德故教分

韻見詩才紫垣近接煙花繞翠幙高張燕雀來更愛西偏青不
了主人須築看山臺

飲錢世恒樓上

何處風來六月寒只疑高閣近江湍酒杯鯨跋當筵舉劔器龍
蟠拂袖看白雨不禁前日大青天偏到晚晴寬西山翠落僊洲
外倚遍君家十二闌

漁翁圖

數株古樹荒溪濱一竿占斷如無人溪深水聚魚亦聚誰遣兩
翁當要津葦間大扁何爲者亦有長竿手中把兩翁得魚慎勿
爭只學收門取多寡

送沈仲威

一江秋水隔娟娟南去美人初放船爲客相逢多異縣如君況

說是同年三吳人物何曾乏二沈
聲名共所傳我忝交游昆仲
裏贈言那惜滿華箋

送董尚矩歸省

楚尾迢迢不計程却因慈母重行行
父為朝士多鄉夢始信江
神也世情錦敕有光天日爛布帆無恙水波平
江都父老如知得莫向津頭候董生

次韻顧天錫九日病起

重來不是舊劉郎籬菊都從病裏黃
小院入愁雙杵外故鄉歸
夢一燈傍詩家供給山當戶客鬢侵陵樹着霜
明日也須扶杖出呼童已製錦為囊

邊文進畫山鷓鴣為遼陽邵令題

黃筌趙昌絕代無邊卿好手皆可模
鸞坡日轉供奉暇餘墨寫

成山鷓鴣鷓鴣只識山中路畫史強之入毫素遼陽有客自高
飛不信韓翁感為賦

同年吳克明知嘉定為題馬圖

吳卿別我吳門去手把橫圖索題句開圖見馬如見人逸氣稜
稜八尺身圍人騎度燕河水萬里長風生兩耳歸來飽啖玉山
禾吳門草青柰爾何

贈張君歸吉水兼問訊劉教授先生

兼素兄

東風不入客衣寒二月扁舟忽下灘到日緇塵詩裏詠還家春
草夢中看諸公臺省堪分席何處山林獨考槃苦憶傳經老劉
向更煩相見勸加餐

送戴校官琰赴漳州

渾河花發照青春舟載儒官下遠津族甲浮梁惟有戴地分漳

水總爲閩檳榔且進盤中食夏楚應生帳下塵學舍五經多掃地願期安定出純仁

楊學士新居讌集分采字韻

子雲一區宅氣勢如爽塏結構藉良工經營信多載虛簷小雨過高棟浮雲藹勝地惜天時華筵散香霽傾倒尊與壘烹魚鼎兼籩園蔬竹有萌土物煙爲醢衆客放情懷諸郎耀文采酒面卧西山歌猴翻小海河朔事空傳江南景仍在詩篇雜戲謔飲量無欺詒不知白石移未許清風改雅集當再期盆荷笑相待

挽畫士范葦齋

藝苑間評到葦齋一時邊氏是夕儕賦詩難使游魂返看畫空將病眼揩酒肆藏名餘瓦缶金門徒步只麻鞋拙工巧宦紛如許今世何人最寡諧

廷試掌卷二首

畫戟連階虎豹屯，九重端拱一人尊。
王言載見如綸出，寒士還同挾纊溫。
地上圖書環壁宿，宮中絃管奏雲門。
朝來識得天心喜，硯沼均沾雨露恩。

華蓋依然逼翰林，大廷對策感重臨。
雨晴東閣天逾近，雲起西山日未沉。
殷序化行無曲學，舜衣垂處最虛心。
三年食祿成何事，第一臚傳愧玉音。

愛茶歌

湯翁愛茶如愛酒，不數三升并五斗。
先春堂開無長物，只將茶竈連茶臼。
堂中無事長煮茶，終日茶杯不離口。
當筵侍立惟茶童，入門來謁惟茶友。
謝茶有詩學盧仝，煎茶有賦擬黃九。
茶經續編不借人，茶譜補遺將脫手。
平生種茶不辦租，山下茶園知

幾畝世人可向茶鄉游此中亦有無何有

閩南王翁重修里社

南閩有龍峰下維里居民里名曰興教民風朴而淳有社昔所
建歲久埋荆榛王翁社中彥動以禮法導謂此如不葺日就圯
與堙學校聚生徒 朝廷聚縉紳市廛聚賈客田野聚農人凡
人各有聚不聚事終泯我力雖云薄此社當我新維木固無脛
山林可選掄維瓦亦無足河濱可陶鈞工匠並手作落成纒纒
旬法律於此讀俎豆於此陳信義於此講孝弟於此申於此勸
農事於此賽田神作朝而息暮報秋復祈春爰有諸父老偉然
古衣巾會飲日將夕言笑皆恂恂少壯從杖者長幼自有倫相
與稱王翁重我里居仁後人庶勿壞千載傳南閩

匏翁家藏集卷第五

詩五十七首

馬遠古松高士圖

寄傲天地間不爲俗士知九衢紛車馬有足難並馳偶來長松下時復一解頰手持白鶴羽萬事付一麾吾心在太古身即太古時所以陶淵明羲皇不吾欺須臾白雲起青山變容姿即此見世故長歌返茅茨

高克明溪山雪意圖

此圖劉僉憲得之任太僕今歸沈啓南後有徐天全跋克明宋仁宗

時人題曰臣克明上進

赤脚真人龍鳳姿俯視蕤薤時游嬉良工待詔金門裏高生前身應畫師含毫吮墨立良久自言臣是唐王維平生胸中無一物獨有山水能容之郭熙成名乃新進

高宗有詩云克明已死道寧逝郭熙後有新成

名范寬得意纔並馳丹青競巧稱院體後來不比宣和時密竹
千岡松萬壑蒼翠峰巒白湖灤岸傍桂楫何處移礪曲茅堂是
誰縛行人暮歸天漠漠遙望前村愁雪落船頭一老獨閒暇詩
思分明入寥廓劉侯朝回過燕市亦復愛畫入骨髓偶從太僕
得此圖每一開之心輒喜天全僊翁惜題字評品數行而已矣
翁今已逝侯亦止兩洞庭荒渺湖水翁嘗自稱大洞庭主人而僉憲家有小洞庭故云
石田多才從後起況有佳兒好文事只今此物欣有託賦詩獨
愧前人耳宋社久已屋宋畫如有神劉侯地下勿長嘆楚弓得
失皆吾人

辛夷牡鷄圖爲筆翁張士行題

辛夷花發照晴川獨立春風亦竦然莫惜錦毛加束縛涪翁囊
底恰三錢

次韻天全翁書遺光福徐用莊雪湖賞梅十二絕

永和人物數諸王，曲水難勝一野航。
得似太湖三萬頃，梅花灣裏作家鄉。

不游鴈蕩即鱸鄉，又被五湖勾引忙。
舉棹落梅春雪亂，開尊臨

水玉泉香

吳城西有鴈蕩村，吳江號鱸鄉。

我愛涪翁與放翁，此翁應在二之中。
登山臨水當年事，北郭移舟舊約儂。

快雪初晴冰滿灣，長溪未許放舟還。
坐移月裏千株樹，卧看湖邊萬玉山。

新築吳西白玉城，城中長作看梅行。
錦袍更向船頭坐，便有神仙世外情。

不向山人道姓名，詞中裴度晚年情。
江南風月無人管，天府新

除老上卿

天落平湖見鬢絲，傍人休笑放舟遲。
杜陵野老愁泥滓，只許青鞵布鞵知。

雪後船窗向晚開，孤山杖屨勝徘徊。
晏然何處玄裳影，想見坡僊化鶴來。

湖口無人踏斷槎，石梁新築仆銀沙。
如今要識經營意，信步前山好看花。

太湖莫作鏡湖看，聚塢銅坑地更寬。
日暮最高峰上立，青天尺五即長安。

連宵朗月在青空，始悞身居大雪中。
莫唱霓裳羽衣曲，人間自有廣寒宮。

爲報春風萬樹梅，年年爲汝費深杯。
徐卿況復能相引，不盡書

山不擬回

陳起東赴官閩中為題松圖

松有歲寒操北地固所宜何年移孤根種之炎海湄土人反吾
疑豈畏霜雪欺不知長養地枝葉恒如斯屈曲賦形質蒼古帶
容姿惜哉仰受陰山上苗離離酸甘適衆口采摘皆及時豈不
見閩產橄欖并荔枝

李遵道竹樹圖

蘄丘常共此君游又向人間見小丘滿目疎篁連古木偶然臨
楮忽驚秋

墨竹

深林不減簟簞谷亂影都歸丈八溝最愛長竿如綠玉何年去
上釣魚舟

墨牡丹

素衣依舊染緇塵
京洛相逢已暮春
偶憶沉香亭北事
惱人偏是畫中真

夏太卿墨竹

今代風流夏太常
并刀時復剪蒼筤
墨君已老湖州逝
却喜人家肯築堂

謝孔昭畫

盧鴻草堂今有無
吳中時見謝翁圖
松風澗水書聲合
林下高人不可呼

史明古過宿

故人過我室
遠自黃家溪
歲暮柔荑卷
中舊路渾不迷
感此十年內
望望各東西
斗酒相欵曲
自起謀吾妻
縱談遂忘暮
日隱柴

門低相逢既不易欲別還悽悽挽衣願少留方牀幸同棲況有
坐間客王汝行將躡雲梯呼童更洗琰春韭亦滿畦是時月初
出光輝奪青藜夜久庭宇空鶴蹟滿雪泥起步脩竹園攬攬驚
鳥啼淨掃竹下壁為我須留題頽然相枕藉鄰家起寒鷄天明
返舟楫吳江正流澌

韻
題治平寺琬上人所藏巨然山寺圖追次虞道園先生

疎林逗晚照際水局柴關中有方丈室翠納千重山山路多白
雲滃然隔塵寰倚筇望嶒岬展席聽潺湲願邀巨然老置我水
石間忘歸飽清暉從此終日間層巒結暝色不逐樵夫還

留題治平寺次前韻

野岸艤舟楫登登扣禪關木杪望飛閣半依茶磨山翻嫌棟宇

高隔林見人囊石湖分一曲殿脚臨潺湲老僧閱梵語趺坐寒
雲間不知城中人暫到非長聞棹歌答空谷沿流月中還

宿東禪寺靜公房

戊戌正月十日

來為東莊游還作東林宿林下扣禪扉幽徑行自熟齋厨夜寂
然倦睡雜僧僕方牀習趺坐飲我一茶足坐久湯室溫洗沐解
塵服衲翁故延款展畫更燒燭透迤水上城突兀月中屋夜靜
風轉號曠野有高木疎雨忽復來春夢不可續端如紫極宮百
感入詩腹便當游汗漫安復事拘束晚歲返舊廬為鄰豈須卜

畫虎

時吳中有虎患

是誰捉筆圖猛虎出山耿耿氣尤怒便欲當前一扼之自笑書
生不能武亂山西繞洞庭波山下爭傳虎蹟多千年故事劉琨
得何日偶然還渡河

陰雨

元旦甲子俗云甲子豐年

春來不獨東風顛以陰以雨仍連連豈惟元日到人日又復上
弦交下弦甲子歲朝傳好語東南民力待豐年天時人事有如
此回首朔雲增慨然

過相城為沈陶菴和天全翁賞菊之作

菊花開日是重陽坡翁妙語不可當我云但得花之趣何必秋
來菊有黃神僊中人壽且康老年見客纔下堂幅巾飄飄映華
髮導我直過東籬傍菴居春風定先到已見菊苗三寸長浩歌
淵明飲酒章悠然依舊虞山蒼素琴無絃舊有例當春賞菊嗟
何妨封題一笑報蘇子為我轉致陶柴桑

過沈啓南有竹別業

是日閱李成畫又觀
商乙父尊下有銘

繫舟高柳下又是十年餘送踏無媒徑重尋有竹居筆精知宋

畫器古鑿商書前輩題名在風流邈不如

與啓南游虞山三首

夜宿相川口清朝喚舟人舟人請所之指彼虞山垠山如知我
來笑迂野水濱藹藹春雨餘翠洗雲中身我亦重茲山竦然正
冠巾虞仲骨已朽高名宛如新悠悠松間路弔古在茲晨放舟
轉山塘行行自知津春服亦旣成庶以適此春

我本不飲人愛山如愛酒春游亦易事出戶即掣肘決策爲此
行所幸得良友譬彼足病弱扶掖乃能走虞山遙在望豈意落
吾手側足亂石間縱目平湖口賞心雖云樂弔古悵然久丹井
事有無刻銘覆華構如何梁昭明書臺蔽林藪

山下有葛洪丹
非宋學士景濂

爲銘又有昭明
太子讀書臺

斜日下嶺西落霞滿川上晚色催人還輕舟復搖漾佳山難爲

別持酒忽惆悵悠然一回首舟尾疊青浪故人知我懷捉筆寫
其狀懷土心未除移山力何壯便如王維詩終南亦堪望流觀
入中夜鼓柁起高唱

題啓南所藏林和靖手簡追次蘇文忠公韻

西湖處士林君復結廬近傍湖波渌百年何物獨傷廉墻下梅
花總寒玉滿城煙火十萬家未信誰人能脫俗壺酒嬉春拾翠
鈿歌鍾入夜燒紅燭獨教老鶴閒應門走傍湖陰濯雙足高平
范公遣使來寄以新詩勝餽肉風節文章厚與淳兩句平生成
實錄才多墨妙更入神只許唐翁和高曲果然遺墨似其人如
倚清風捫瘦竹惜哉甫里天隨生不趁斯人書杞菊

題啓南寫贈袁德純同年萬叔春雲圖

袁卿高爽不可攀平生眼底無吳山肩輿偶度支硎嶺俯視龍

池纔破顏前山後山作屏几千步橫岡鋪翠被向曉濃雲觸石
生當春好雨從龍起吾鄉沈子今王維筆端萬壑能移之圖成
欲贈袁卿去却請我輩仍題詩天台鴈蕩東南有卿昔好游曾
遍走縣齋書靜對新圖從此不須開戶牖

贈袁德純別

太平肇為縣乃自黃巖分阻山且薄海土俗殊信信持牒好爭
訟於古已有聞雖云士風美甘露難救焚幸哉百里宰一朝得
袁君君來坐堂上顏色無戚欣謂民如絲然治之豈宜焚清節
我自持濟以慎與勤踰年能化服相顧歸耕耘公庭晝寂寂凭
几西日曛猶恐耳目隘適野訪憂瘡肩輿之所至如渴皆醺醺
君本廊廟器壯年躡青雲胸中十二策獻納同河汾小試出等
流信矣光斯文今茲報政還道經吳淞濱自慶忝同薦詩以揚

其芬

出閨門與陳味芝諸公送德純舟經山塘登壽聖寺閣
時雨初霽西山益佳還飲舟中爲陳允德題啓南所寫
春壑晴雲圖是日文宗儒談龍事甚異故及之

偶聞客談萬山中靈湫一勺能藏龍春來佳氣滿空谷想見龍
起雲爭從誰驅雪浪盪我胸驀然吹散渾無蹤半塘雨過登高
閣引手欲摘青芙蓉

秋林高士圖

風回木落多霜降水流慢高士謝俗塵溪頭獨來慣班荆成坐
久天日喜清晏野曠山盡出隔岸殊可辨度嶺識樵夫遙知有
雲棧王丞在北垞柳子游南澗山水樂亦同君應免譏訕

贈張汝弼知南安

闕下五色雲爛爛非煙霧吳會天東南却因風吹度夙稟澤物
心終為濟時具迢迢大庾嶺人出南中路既滋九齡松亦復漑
梅樹觸石此其時終焉遍天下攬之願少留飄然不予顧

楊太真剖瓜圖

深宮六月涼風至紈扇團圓奪秋氣却恨君王賜浴遲華清水
熱通宵沸金刀手弄雲鬟低楊柳樓頭日已西莫誇碧椀紅瓢
美玉齒病來憎瓠犀

題萱草圖為從母張孺人六十之壽

北堂慈母坐薰風萱草當階見一叢莫向洛陽看舊譜此花真
是壽安紅

題劉僉憲廷美寫遺啓南畫

寂寂茅亭下悠悠野樹邊扣門無俗客題句有詩僊虎蹟黃泥

坂鵝群白石泉相城回棹後畫裏故依然

山行十五首

過橫塘

夏半橫塘風日多畫船載酒壓晴波高田得雨皆秔稻長蕩翻
雲足芟荷未必他年成故事也須隨處結行窩悠悠十里城西
路此是登山第一歌

謁韓蘄王墓

家國何多難推尋為蔡童羸秦方逐北周室竟遷東江左朝廷
在淮南驛騎通天終憐宋土時則有韓公一劔橫天外諸酋在
目中南雲當箭鏃黃蓋走艤艫伐越期成霸于潛耻曾戎蕭牆
狼跋盡野穴鼠群空聚米籌三鎮開門待兩宮齊王真濟美鄂
國與爭雄有詔從中制惟詩詠內訂閒游嗟我獨和議約誰同

殉葬長弓勁題銘片石穹龜趺呈細刻龍額表孤忠草樹樵蘇
斷案盛享祀豐神靈懸皎日生氣亘長虹異代今全盛當論保
障功

望穹窿山

我昔聞吳諺陽山高抵穹窿半壯哉拔地五千仞始信吳中有
奇觀銅坑鄧尉作屏展天平靈巖當几案其間法華與雅宜水
邊橫亘如長岸何人著山經宜作吳山冠但嫌地勢高山家每
憂旱舟行半日青已了却被濃雲忽遮斷水回路轉二三里依
舊諸峰青歷亂人云山頂百畝平合結茅廬傍霄漢龍門勝蹟
未遑添坐向船頭先飽看

經玉遮山

見山不識山借問山中人玉遮亦深秀翠色聳嶙峋肩輿繞其

趾面面松杉新峰巒稍回伏穹窿復呈身細草被長岸盛夏無
埃塵乘閒即行樂願作茲山賓

入蒸山謁徐天全墓

平生晁賈共襟期欲使才名百世垂衆口是非何日定老臣功
罪有天知湖山彷彿精神在杖屨從容歲月移逝矣姚崇嗟不
返憑誰爲刻墓前碑

觀眠松

盤盤蒸山麓側徑頻折旋山人引我去云有長松眠石磴被蔓
草攝衣步相連果然見奇樹如神龍蜿蜒鱗甲生滿身仍怪鬢
鬣全恍若出巨壑疑將赴深淵未學擾龍術却立不敢前天風
谷口起繞視惟茫然枝幹旣屈曲不中棟與椽茲山非櫟社亦
復全天年旁有短石垣制作良且堅四塚屹不動密累皆古軌

斷裂蒼蘚間有碑昔人鐫銘文已磨滅篆書冠其顛曰宋故主簿陸公墓
銘荒山少居民始知陸公阡摩挲發長嘆助我松聲圓草棘莫
剪除應乏雲仍賢旭日照松下因之弔重泉

入銅坑

銅坑山下摘楊梅曲徑人從樹杪來共愛石橋涼氣逼湖梢未
放酒船回

泛下崦

新春已負雪湖梅却爲揚家果特來落日酒船山色裏水南人
道畫中回

泊虎山橋

南人相見詫杭州自料西湖讓一籌天爲漁家開下崦晚宜書
舫駐中流新詩已判縱橫寫佳境從教次第游孺子歌聲何處

起落霞孤鷺水悠悠

飲七寶泉

誰將七寶地貯此一泓秋片月從空墮清冰出壑流冷涵山骨
瘦細咽竹根幽半勺能消暑名宜水記收

入玄墓寺

高登鄧尉山遙入玄墓寺老僧具衣履出門迂予至落落長松
間一徑獨深邃鞵鞞鍾磬聲鳥雀少驚異仰面睇山腰殿宇危
若墜長廊掃清風脩竹自爲篔結夏四五人趺坐更無事樹密
山果懸草深井泉秘盤旋登小樓洞庭正相值洋洋太湖波兀
兀林屋翠始知衆山中此寺真畫笥聞昔萬峰老卓錫據茲地
道行旣孤絕遺言有高致化去動吳人金帛爭布施歲久骨當
朽遺容未全敝禪堂晝寂寥雲水乏供饋惟餘佳山水不改太

古意磨厓紀勝游吾當一題字

懃奉慈菴菴中有白山茶

野寺堪逃暑登去扣關林深長礙樹路轉又逢山石鉢分中
飯雲房借半間玉茶花落盡坐撫不知還

登光福鳳岡

昔年曾學登山法縱步不憂山石滑舍輿徑上鳳岡頭趁此涼
風當晚發遠山朝臣抱牙笏近山美人盤鬢髮我身如在巨海
中青浪低昂出復沒山下人家成市廛家家炊煙起曲突梅林
屋宇遙隱見一似野鳥巢木末寺僧見山如等閒翻怪群山競
排闥偶凭高閣發長笑笑我胡為躡石鉢夕陽滿目波洋洋西
望平湖更空闊山靈為我報水僊預設清冷供酒渴吳人非不
好登山一宿山中便愁殺扁舟連夜泊湖口舟子長篙未須刺

懶游已笑斯人駭狂游不學前人達若邪雲門在於越何必青
鞵并布鞵

飲海雲院百丈泉

白雲翻海濤行人渺無蹤蘭若曰以名秀倚青芙蓉茲山非百
丈泉名與山重問泉所發源寺僧偶相逢涓涓出亂石灑灑循
長松山中不鑿井飲足忘深冬始知白雲多護此蜿蜒龍品評
藉道園遺畧無塵容所恨生也晚操杖何由從步來當長夏坐
挹清心胸紀事強追和豈圖碧紗籠謫僊詠瀑布莫訪香爐峰

觀海雲院連理山茶

奉慈山茶好標格花開如杯呈玉色海雲山茶更絕奇奇處不
論紅與白兩株竝植東軒前密葉如屏遮几席枝柯一一相交
加為是同根忍分拆初疑一人獨叉手忽作兩人仍促膝少焉

掉臂纔跬步又復控卷當肘腋碧玉磨沙成玦環青絲綯索分
繳纏我來庭際稍摩挲引子春蛇憂毒螫試量旁榦得三圍每
掃落花凡一石風霜飽歷三百年未識何人手中植尋常繞樹
多詩客塔下莓苔留古跡河中曾辱昌黎文西蜀休誇孔明栢
世間大樹儘有之似此山茶何處得

匏翁家藏集卷第六

詩四十三首

與參政祝公游正覺寺

寺為元陸志寧別業舊多梧桐相傳志寧每洗之更有竹數種

曰名竹堂後廢有僧洪創為寺

陸公已逝逐浮塵
洪老重來刈野榛
百畝園林成故事
一天風雨醒游人
碧梧淨洗今何在
脩竹叢生舊有因
白髮耆英留醉

墨晚涼傳玩席間珍

吳仲圭鈎勒竹

仲圭嘉興人號梅花道人葬處題曰梅花和尚之塔

畫家不見吳道子
石塔尚記梅沙彌
百年筆法兼眾妙
又向人間看竹枝
秦川織錦文
瑣碎嶮谷截玉形
參差苦心却怪揚雄
語雕虫篆刻嗟何為

喜雨四首

雨挾風潮勢未休，何人對此獨忘憂。
桔槔挂壁農夫坐，起舞茅簷忽打頭。

農家勤動自新春，怪見平疇有斷紋。
孺子何曾知稼穡，過庭沾濕亦欣欣。

不飲何曾說半酣，飯餘捫腹已堪慚。
疎慵又感天公惠，午後當階雨最甘。

荒園潏漑趣奴星，曉起常聞汲井聲。
菜飯始知畱客易，花闌更覺照人明。

與賀美之過陳湖訪陳氏昆仲再宿東明院時玉汝居
京師而主僧頓公沒矣因遺其徒良琛

東明院裏重投宿，偶見前題一慨然。
欹枕亂蛩如昨夜，入門高樹却多年。
季方不與元方在小朗，還同大朗賢。
何處玉笙吹六

歌山扉新月與人眠

過磧沙寺

寺西有蛟龍浦中有藏經坊僧云鳥雀不入坊中元詩僧至天隱自江右來居此號筠溪

有詩集

日斜湖上過野寺倦登臨老樹風聲合頽垣雨蹟深蛟龍潛近浦鳥雀避叢林不見筠溪叟詩禪久絕音

韓文公度藍關圖

光福徐太守家藏

韓公上書諫佛骨自分投荒生不還忍寒作詩示姪輩千古增重藍田關關門雪深阻去馬直氣早已開衡山唐皇殂矣骨亦朽瘴江無墓空潺湲嗚呼瘴江無墓空潺湲潮州廟碑不可刪

遠游

嗟彼城市人而有江湖想如何屋下身忽在扁舟上遠游無定蹤日日憑五兩南風舟尾發千里落吾掌如觀山海圖瞬息歷

九壤扣舷歌離騷八極願長往旁人發大笑此語意何廣屈子
百世師未許後人倣

酬海虞陸生寫 賜服像

臚傳春殿偶前行 賜服深慚出上方豈爲形神勞繪事故憑
粉墨著 恩光詩中曹氏今爲庶壁上吳生遠擅場歸到山林
還有託幅巾偏稱鬢毛蒼

李龍眠劉阮遇僊圖

誰與龍眠作畫評高唐雲雨筆端生欲知劉阮天台事試讀韓
子桃源行

趙松雪長江疊嶂圖 李貞伯藏

長江滔滔向東瀉憶昔扁舟順流下慈悲閣前浪花白兩岸青
山似奔馬蕪葭楊柳風颼颼江行六月疑深秋歸來已是十年

事者畫偶然思舊游江流樹色非邪是仍見山腰隱高寺赤岬
滄洲杳靄間只尺悠然起愁思茗溪影落鷗波亭王孫弄筆何
時停北來戎馬暗江許千古遺恨歸東溟

題張外史伯雨贈曲阜孔君詩後

結廬句曲號貞居石鼎千年句法如所有白雲難贈客豈無清
露可為書湖陰小閣題金菌月下高冠製玉葉白首交游洙水
上歸儒深恨早回車

王叔明山水圖

叔明號黃鶴山樵

黃鶴高樓已槌碎空有江南黃鶴山山深有客持樵斧終日置
身林木間臨風高歌白石爛隔水或看秋雲還老夫亦有幽居
興對此徑欲移柴關

倪雲林墨竹

古來畫法即書法時從用墨窺良工雲林胸次本高潔墨氣自
與爲人同扁舟日暮過甫里竹梢落紙含清風想應停筆悵然
久詩思遙逐天隨翁

沈恒吉小景

扁舟同泛十年前夜宿西山一塢煙逝矣斯人猶在目古村黃
葉帶清泉

畫鷹

林塘秋晚木葉稀瞥然如塞原憲衣野鷹木末俯首睨豈欲供
爾清晨飢嚴霜塗塗百草暱平郊且莫張虞機天空海濶羽翻
健終當一擊奮我威區區鷄鳥何足數草間任爾東西飛

畫鷄

杜翁昔賦縛鷄行韓子曾聯鬪鷄句朱冠鏤距本同形勇怯在

人分感遇鷄耶被縛良可嗟聞鷄雖勇何足誇爭如此鷄只獨立昂然不屬詩人家

過吳江瑞雲觀 陸道判建黃文獻公有記

笠澤磯頭訪瑞雲洞門高掩寂無聞重湖急雨過龍陣小塢亂石眠羊群有懷廬山陸脩靜敢比會稽王右軍與客松陰論往事摩挲殘碣慨遺文

舟經荻菀阻風留宿王抑夫田舍 時水荒後

歲暮江村落日懸誰家漁網設平田岸頭行客訟風伯堂上主人疑水僊斗酒急呼聊慰藉扁舟欲去重留連荒溪白屋炊煙少縣吏那堪橫索錢

題王叔明遺沈蘭坡畫

黃鶴山人樸古松踏月夜訪蘭坡翁浴鵝溪邊放杯酒尺素頓

發青芙蓉百年坐卧松雪中似舅宛有王孫風誰教彥遠作畫
記姓名也合收王蒙清霜不管坡蘭叢蘭芽仍茁吳門東山人
倒騎黃鶴去黃鶴一去青山空

巳亥上元夜有感

夜堂春酒十年前白髮朱顏笑語傳孤露餘衰雙袖濕淒涼無
寐一燈懸長街未盡人猶走急雪初晴月正圓身在故鄉悲感
集他時今夕况幽燕

胡瓌番騎圖

漢家詔下五將軍虜騎衝寒度塞雲終信奇功收幕府如今不
是奉春君

韓節婦

閨門煙火萬家稠獨掩深閨賦栢舟曾識市中無二價肯將從

一負韓休

爲姚文裕題畫

憶醉園池之上悠悠二十餘年城裏人家似此畫中風景依然
與李貞伯游東洞庭六首

過木瀆

舟行三十里初向瀆川過客路偏逢雨人家盡枕河橋橫光福
嶺水接洞庭波悠爾嗟春及田間見荷蓑

舟行出胥口

孤蓬遙蹕太湖心着雨高山水墨深積氣上蒸炊正熟弱流西
注壓將沉不日迢迢辭清賞轉覺空濛助醉吟詩裏白公誇月
夜未知奇觀屬春陰

游太湖翠峰寺

步轉危峰路豁然梅花叢裏見青天春泥不污登山屐又過長松啜冷泉

興福寺小憇

九塢寒泉一澗流遙從木末望山頭春風未掃禪林雪更爲梅花半日流

湖上望西洞庭山

百家棧上望西山縱目遙過銷夏灣未遂真游勞指點聊馮高興去躋攀石壇相距纔十里林屋都來有萬間報與山靈須少待會將親手扣僊關

飯法海寺

行盡松杉嶺慚平日高深谷喜新晴山樓飯罷渾無事獨倚危闌聽水聲

游惠山入聽松菴觀竹茶爐

菴有皮曰休醒酒石時齋姪隨侍赴京命和二詩

與客來嘗第二泉山僧休怪急相煎結菴正在松風裏
名還從穀雨前玉碗酒香揮且去石牀苔厚醒猶眠
百年重試筠鑪火古杓爭憐更瓦全

游金山

大舶西來趁晚潮留雲亭上興飄蕭水從滌潏流
偏急春到崑崙雪盡消萬里京華瞻北極一時人物慨南朝
中冷入口平生足坡老詩篇已命騷

瓜洲阻雨留曹氏館

水長瓜洲上鱉魚高樓三日雨疎疎主人能慰江南客
晨起呼童作筭道

宿邵文敬清江官舍為題高房山畫卷

淮南春夜風兼雨空堂蕭蕭雜人語戶曹好客無與娛故展長
圖慰羈旅大山矗矗如覆釜小山歷歷還聚黍人家隔岼見衡
茅艇子隨潮歸浦叙眼昏莫辨雲中樹據案呼童執高炬千里
悠悠亦遠游却喜意行無險阻閭閻城中爲我家俗事到門多
峻拒平生惟有山水緣招我登臨無不許憶昨離家始浹旬此
物依然入東楚乃知高侯畫有神未讓道寧與僧巨願君從茲
慎藏弄對棋寧賭淮南墅

過呂梁洪

力盡千艘勢若傾隱然門限入彭城漢封岱嶽分來脉禹鑿梁
山擬舊名高岼茅茨民舍穩繞灘風雨客心驚平生亦愛王陽
語壯歲難辭險處行

徐州阻風

蘇家故事畱詩句仍見夜中風雨來水激萬艘難捩柁鼓行千
陣不銜枚怒號應撼藏蛟窟奇觀須登戲馬臺河上去程誰算
得擬尋石室弔桓魋

與徐仲山東行五首

望嶧山

魯郊空且曠自力安能窮倏見千仞青橫截于其東群山相後
先蹲踞猶兒童尼丘亦遠避何曾數龜蒙嘗讀禹貢書其陽產
孤桐剪伐成何用茅茨舜為宮諒惟製琴瑟搏拊歸良工因之
懷古人仰睇雲霄中

觀泗河

四源合一水古河因以名望之渺千頃永口汪然清蕩搖鄒嶧
山映帶兗州城餘波入漕渠資國功匪輕疎濬藉水部來往勞

經營欲渡免舟楫石堰築且平臨流一縱步魚鱉不我驚即欲
窮其源何惜此數程念昔洙泗間講業皆諸生河廣豈水然聖
澤惟盈盈茲游幸沾溉自慶非徒行浴沂效前哲春服亦既成

入孔林

兩楹既夢齒黯矣斯文光巍巍魯城北冠屨於焉藏墓木不可
辨合抱十萬章知爲門弟子移植來四方惟昔治任日相向哭
且傷孰知千載下儒者猶心喪愚生復何幸瞻拜俄其旁去我
有周末藹然覲溫良如陪游與夏執贄同升堂惓惓東引領夙
願今始償嶧山千仞高泗水百里長何必四尺封天壤俱存亡

觀手植檜

魯宮久已壞孔宅仍如新悠悠二千載手澤嗟尤存所存匪他
物奇樹當高門矯矯歷霜雪青青出埃塵親承時雨化生意常

欣欣相傳藉文字烈火經羸秦而此特萌蘖挺然異其群群木
繞庭際合抱高入雲尋常豈得似隱起成旋文端如人索綯微
繹依然分米芾好奇士於道未必聞玩物有述作意與石丈均
我來重謁拜欲去步幾巡維魯多松栢斲度見詩人徂徠與新
甫遙瞻失嶙峋

謁宣聖廟

林立穹碑蝕古苔廣庭端拜殿門開玉封高竝東山峙聖澤長
盈泗水洄已冷阮灰科斗出未行綿叢太牢來只今老樹成連
抱天遣森然愧宋雕

匏翁家藏集卷第六

匏翁家藏集卷第七

詩二十九首

再至都下葺故廬

城東地僻稱吾曹，匠石功成屋脚牢。
九市塵埃真可避，一天風雨漫相撓。
不嫌巷隘妨肥馬，却愛牆低過濁醪。
終老吳門敞廬在，叔孫必葺笑徒勞。

答潘時用和前韻有卜鄰之意

詞林無事本清曹，頗勝山虞掌獸牢。
半畝住來鄰可卜，一朝謀定客休撓。
過從須免投空刺，稱賀先判出宿醪。
總道詩人家具少，載書仍有借車勞。

送表弟吳子高南還

冒暑擎舟來衝寒，上車去非關好遠。
游骨肉情深處。

寄洞庭施翁二首 故修撰槃之從父

流泉匝屋老梅村
憶接春風笑語溫
曾識醉翁山水意
為收尊俎只開門

先朝翰撰是諸孫
白髮清門古道存
送客過溪成久立
不扶藜杖到黃昏

送蔣元用知樂亭

雨後泥途僕馬勞
東馳急欲試牛刀
早從鄉里知民事
不為科名重吏曹
海岬循行秋水盛
淞江瞻望白雲高
漢書每愛桐鄉說
史筆無能亦強操

憎蠅

依然秋後轉多蠅
信矣歐公作賦憎
讒說欲行曾止棘
寓言猶在却疑冰
絞蠅取象緣文足
揮麈妨眠罷曲肱
一夕北窗寒氣

至營營知爾亦無能

送顧郎中天錫調永州同知

西南山水富清幽子厚文章記永州此地一行殊不惡何人三
黜獨無憂全家下瀨馮孤棹空橐迎寒典敝裘便道吳西親展
墓却非前度望松楸

苦雨歎

朝雨風從西暮雨風從東東風西風朝復暮繞簷雨脚惟隨風
長街泥深困牛馬廣庭水漫歡兒童今年春熟已無望秋禾復
偃溝塍中禾頭生耳應俗語哀哉歲計嗟成空朝班侍立日復
日日聞銀臺陳疏封四方水災什六七祈免二稅須年豐

聖君無爲抱淵冲一語悉屬司徒公司徒經制在國用爵賞所
費財當充江南被災已十載田疇今與江湖通都城此雨有深

意天欲示人如發蒙 詔書寬大行當下作詩欲賀耕田翁
為陸病逸題畫

一卧茅廬三月深出門秋水散蹄涔亦知病裏多新語不肯從
人換橐金

送馬庭簡赴福寧州判

胸中貯書十萬篇清詩妙墨皆堪傳平生知己有我在當世幾
人如子賢向來六館同周旋石城風月仍年年青袍徒步赴銓
選白日旅舍窮殘編年餘五十得州佐差勝抱關并乘田眉間
乃有毛義喜便道得過庭闈前上堂捧酒拜家慶紆朱曳玉何
須憐秋盡黃花開未全小春想見江南天臨平山中樂三月雪
晴好泛閩江船

次韻題元新昌呂孝子德升詩墨後

百年純孝出儒門天意能令片紙存手蹟封題聯從子人家收
拾仗諸孫蛛絲煤尾呈奇物春雨秋霜感厚恩南望沃洲山下
路草堂風月冷琴尊

壽徐耕學

鄧尉山中一布衣築堂住近釣魚磯扁舟綠水纜三尺小圃黃
花滿四圍公府招延開幙久里人爭訟入城稀祝翁強健長如
此老作田鄰願莫違

壽義門鄭仕信母八十

白麀溪上舊旌門舉案何曾有婦言獨向一身完至行能令三
子荷慈恩長繩欲繫西飛日春酒來如初發源前去耄期纔兩
武含飴還待哺玄孫

次李賓之用陶韻止詩

昔觀止詩詩意謂詩已止嗒然吾喪吾翻在辯說裏淵明寧止
酒文術乃責子苦思得孟郊新聲有侯喜紛紛諸詩人一言子
可起何況數百言和荅各有理茲事已三年屈指丁及已穰穰
京邑間散落亦富矣秋水盛呂梁安能辨涯涘寥寥十二篇眼
中邈商祀

臘八日 賜宴

詔遣長筵列鳳池人間節序九重知食傳內饗真成例坐接同
官易得詩雪裏高寒瞻玉宇風前微動識朱旗十年左掖頻分
席深愧黃封酒滿卮

與陳起東食臘飯

歲暮相過恨少歡小筵臘飯擬春盤休開碧碗抄雲子旋把金
刀鏤雪團故里幾人同雅集吾生今日本間官天寒更爲呼尊

酒醉後猶能賦伐檀

寄光福徐雪屋

吳下隱君徐雪屋久緣山水伴漁樵孝廉有士還堪薦貧賤於人真可驕書卷夜當巖月展布袍寒傍渚風飄銅坑深處楊梅熟尚憶題詩坐石橋

庚子立春朝賀

金闕遙開動樂聲殿前袍笏侍春卿歲星忽傍東方起曉日初辭北陸行擬學宋臣題帖子待看唐室進讎名禮成再望天門拜列坐均霑錫燕榮

讀陳玉汝紀夢之作

憶年三十憂無兒紙上僊翁誰贈之沈卿自云手親寫儼然挾彈張鬚眉悠悠十五流年內兒子三得仍三遺門懸弧矢雖暫

喜架挂襁褓翻深悲只今沈卿亦逝矣厚意虛辱令人疑翰林
吉士東吳產長身廣顙兼豐頤視予屈指五年少三兒王立肩
參差尚憂娶婦孫未抱天生兩臂將安施沈卿有子尤善畫良
夜夢感僊圖披起來捉筆忙志喜一段奇事成新詩陳君陳君
真好奇向人說夢何其癡惟君有子昔無夢如我有畫今無兒
蘇家軾轍亦偶爾此例豈可攀而爲從來仁者說有復敢以天
道寃無知君心不足隴還蜀我欲易滿堯之夔明年相與發一
笑我當弄璋君令飴

辛丑元日次韻羅明仲洗馬朝賀

紫垣兵衛法句陳立仗天階滿瑞慶律應宮縣分氣候光生庭
燎散星辰周詩所願無如壽堯德難名總是仁玉殿三回叨侍
從衣冠深沐御牀春

郊祀畢承天門迎駕

禮成郊祀屬新年盛事休誇古賦傳萬馬盡驅驚海瀉六龍徐
度識天旋日高衣服依黃鉞風細韶音隔綵旃只尺堯眉真可
覩華夷拭目共爭先

慶成宴歸招陳起東賞燈

正月十四夜

公署齋居長曼曼三日盡將葷酒斷故人契濶令我思欲往從
之足如絆翻然騎馬何處歸御宴日高初飲散腹囊例許携其
餘猶有郊壇牲一段午窗坐睡晚始醒婦輩堪呼僕能釁盤殮
已具酒有無拍拍欲浮欣滿罐竹爐火暖酒慚温互鼎湯鳴肉
先爛作詩聊代折簡招及此孟春今始半客中無物相與娛一
盞華燈光燦燦煩君爲我搜詩腸佳節豈宜空對案酬和惟應
陳與周王已女要見纍纍珠一貫忽忽步屨不可遲他日來觀成

柿灌

元宵獨坐

屋底燒燈俗強同蓮花照眼辦能紅月光轉向中天好人意何
如昨夜濃十四夜與起東王汝原故里關心惟弟姪誰家拍手
已鵬詠至三鼓始散

有兒童春風又報城門析起步空庭見斷鴻

翰林宴集閣老以宣召去

白玉堂開酒未闌忽傳中使下金鑾漢家事事歸臺閣猶幸三
公坐不安

送孔憲副赴廣西

十年大夫官亦榮蕭然被服仍儒生胸中自有萬人敵何勞擐
甲兼操兵嶺南群蠻昔猖獗于戈滿眼尸縱橫連民竄伏遍荒
野高州殘破餘空城是時君來作民牧仰天誓欲安黎氓身騎

羸馬從辱卒瘴嶺惡谿循數程群蠻望見遙相驚我來惟伏信
與誠片言開諭纔脫口馬前羅拜咸輸情腰懸木牌悉聽命手
斷藥矢誰違盟弱男寡婦免係累山谷日昏猶哭聲惟連惟高
我守令汝獍汝猺吾父兄軍中主帥驕心萌謂此已降皆可刑
獨將一身保萬口訖今軍旅休南征君於異類且有德斯民眷
眷能相傾祝良張喬世重見人物信是吳中英外臺遷擢終借
寇上國追隨爭識荆同鄉數聆情話好偏怪不肖誇功成邇來
用兵貴神速時有威寧海之襲下僚旋踵登公卿以君累歲出死力有
司豈合先知名迢迢桂管古所置領檄再作西南行投荒歷險
自無怨公道藉藉歸時評奇功聊爾錄一二碑文敢擬淮西平

懷脩竹書隱

春寒漠漠雨漠漠假寐書牀午夢醒十載客居便巷陌一時鄉

思繞園亭繁花照檻知堪賞亂石鈎衣憶所經恰有古苔三畝
綠都來脩竹萬竿青當窗好鳥通人語挂樹危藤學字形日射
韭畦朝可剪香疑椽室晝常扃鹿場舊築猶存號鶴冢新封未
刻銘架上殘編歸擬讀移文不待北山靈

題倪雲林畫

雲林晚歲斥賣田宅念其友張伯雨道士

多死徙雲林獨無事人始賞其
有見王光菴為墓志特載其事

黃金散與列僊儒江上扁舟逐釣徒為語紛紛評畫者要知迂
叟不為迂

匏翁家藏集卷第七

匏翁家藏集卷第八

詩四十四首

分題武城送奚郎中歸省

舟行漕渠上日暮臨孤城泊舟試借問因得茲城名
逶迤無百雉人煙少交橫叢爾齊魯間獨感郎官情
吳門至洙水豈乏三十程偃也能北學學道功乃成
一朝辭孔席去作邑宰行爲治以禮樂用武忘甲兵
宣尼昔枉駕轍蹟猶分明壯哉孰非縣不貯絃歌聲
遺風被千載易使還黎氓問俗野煙起懷賢春草生
因尋言游室更酌澹臺瑩

分說字韻送起東赴江山教諭

門前短狐裘下馬立深雪憶君遠來初寒氣方凜冽
俯仰曾幾何時候已向熟三日春風顛黃塵沒車轍
城南大道傍正怪柳

可折悠悠二十年會合嗟久缺旅館相過從情話始親切新檄
復自持向我忽言別別路何所之遙遙指東浙邑以江山名信
美不待說獨言抱高才進取一何拙長鬚漸斑斑仕版仍下列
幸惟師道崇君子意所屑置酒臨長濠適值修禊節觴詠爭騁
懷我獨如哽噎挽衣不能畱越柁行且挨惟君處鄉閭早歲得
詩訣運思無疑滯往往筆為舌客居屢相投佩誦總清絕只今
屏障間一一懸珮玦離憂聊藉茲庶幾自怡悅

分服字韻送姜恒頰御史赴南京便養

落花芳草連平陸驄馬行行入南服豈無斗酒可畱君頭白高
堂懷就祿婁水雲低異太行秣陵天近如韋曲過庭莫道諫書
稀手中自削三千牘

謝孫希說送蒲團

新編蒲葉未全乾，倦坐藜牀每弄丸。
罄矣相隨無長物，塊然宜付此閒官。
禪心似彼何時動，病肘從今有處安。
聊就坡翁偷謔語，一詩換得兩尖團。

東坡謝送蚌螭之句

為費廷言題沈士侖畫枇杷雙鼠

古詩三千兼刺美，孔筆不曾刪。相鼠齊諧志，怪到張華博物應。
疑鼠有牙虫魚註，成非磊落韓子作詩譏。郭璞後來埤雅亦何為，
為中有鼠譜煩農師。鼪鼯鼯鼯本同族，散在人家稱小畜。畫圖
此種栗鼠否竹，颺野處同其儔。紛紛恣食高廩米，畫伏穴中那
有體。一前一卻誇委蛇，李斯為汝誤已多。暖風吹林金顆顆，獨
在江南飽珍果。永州事敗無子遺，甘與鷓鴣守一枝。

張子俊畫松

周尚文太僕藏

案頭佳楮不盈尺，上有千丈之長松。非關月落影如許，連蜷欲

起雙蛟龍我方隱几當清晝彷彿徂徠見深秀空堂颯颯風聲
寒滿把稜稜霜骨瘦昔聞張卿人品高王芾與之稱二豪鳳池
揮灑出天趣往往筆底翻波濤杜陵詩翁去我遠愧此畢弘與
韋偃故園舊種陰已成獨客燕山歲華晚

過玉汝半舫齋觀童子種植

豆籬瓜圃旋看成坐覺齋居意思清待到翠陰堪覆坐老夫須
挈酒壺行

歲寒三友圖

檜生巖壑裏凜然歲寒姿衆卉豈不好貞心少相知南望庾山
麓北瞻淇水湄氣味雖膈合猶恨道遠而生綃纔盈丈一旦聚
于斯匪籍縮地術良工親手移能事出腕指託物由心思邪人
多黨與蔓草難芟夷正士每特立嘉樹不附麗時或倒置之山

苗反離離維此一堂上霜雪同襟期聊因草木類竊比唐虞時
后稷既在位繼以契與夔紛紛共鯨輩末路將何爲

陸參政挽章

一世惓惓義舉心宦途豪俊每披襟秋臺吏牘陽春暖炎海戈
船島嶼深客滿鄭莊曾置驛人如陸賈却無金錦雲溪水聲嗚
咽執紼何勞更託音

端陽日

是日夏至

夏至端陽一日來人間節序併相催飯包青箬爲時食甕拆黃
泥有宿醅幸少俗塵栖陋室喜多甘雨潤枯荻此時又作家園
想筍籜藤花滿石臺

寄顏澄之工部

京口相逢又一年別來書札賴人傳午窗睡起頻揮汗最憶金

山共飲泉

郭忠恕雪霽江行圖

沈啓南藏

路出三峽風颼颼江天雪霽宜行舟水枯灑灑高突兀木葉落
盡俱東流艤艫相聯蔽江下半空結構如危樓兩舷之間可走
馬主人恐是王益州獨嫌百物具蓬底如何不設戈與矛後繫
一舟亦千斛什器滿載餘瓠甌青簾翠幙互掩映綵繩錦纜紛
綢繆玉爐頻爇沉香火寒氣不到珊瑚鉤篙工柁師噤無語指
落層冰誰爲收安得挽以百牯牛代汝僕夫力且休人生得意
在富貴鄉里小兒驚宦游望中隱隱連遠洲深樹落照哀猿愁
日將暮矣泊何處萬里幾轉青山陬狂僊畫筆窮冥搜圖外意
思令人求陶翁願弃五斗米未肯折腰從督郵飄然輕颺孤舟
去惟有葛巾猶在頭高哉斯人誰與儔嗚呼高哉斯人誰與儔

送伊德載赴南京刑部

闕下爭看進士袍南行又喜入刑曹青雲濶步空塵土丹鳳孤
飛好羽毛茂苑百年門巷舊先世吳人甲科兩世姓名高族叔侃丙辰進士
不須分祿遥爲養甘旨公餘手自操

題畫送陳明遠赴丹稜令

洞庭木葉起秋思正是扁舟入蜀時十里山城知臥治卷簾清

書見峨眉

賦鍊甕城送費廷言歸省

鍊甕城何崔嵬孫吳昔此作京邑萬夫築土施金椎上有千雉
環列下有四門洞開隱然屹立絕飛鳥獨許北固山相陪吾嘗
登其上縱目重徘徊西瞻秣陵樹南望姑蘇臺北瞰長江作衣
帶東觀巨海如酒杯城中多居民市肆浮紅埃時平目不識兵

革城闈積雨生青苔萬室相掩映水曲并山隈
茲城真畫笥收拾能兼該芙蓉樓頭朝日出鳳凰池上春風來
官寮登高或乘暇能賦豈乏王與枚郡人暫從天上回都門車騎聲喧逐當筵
何物可贈別一闕鍊甕歌新裁北固有時崩鍊甕無時隤詩家
比興義竊取堅爲君操高爲才秋江水滿君行哉

與僚友出城餞廷言後入月河寺

月秋水瀉城陰十里沙隄馬蹟深自笑竝游如宿約祇緣清
坐費新吟危亭近逼孤雲角小徑潛通萬石林不是已公畱客
住晚天涼思正盈襟

爲李瑞卿寺丞題王叔明義興山水圖

陽羨山深懶杖藜臥游三日路仍迷雲中望見乘舟者始識遙
通畱畫溪

與蔣宗誼城東觀泉因憶舊談越中五洩之勝

秋早俄驚急雪流夜來高岼雨初收同行賴有三山客試問何
如五洩游歇馬旋成燕市飲扣舷遙想越人謳玉泉山路涼風
爽還約尋源向上頭

次韻張汝弼見寄

其詩有詩法將隨陸放翁
又立命獨嫌磨蝎宮之語

盡去淫祠如狄相大興鄉學類文翁郡中有守今難得嶺下斯
民久不逢詩法雕虫成小技術家磨蝎忝同宮遠期君子來朝
日橫浦風高起雪鴻

任月山九馬圖

前元畫馬任月山九馬意態皆天閑開圖似具方臯眼不在驪
黃牝牡間日午歸來千里道渴者飲泉飢斃草風前汗血流未
乾仍見雙蹄騰握臯曹韓已遠圖有無猶賴杜老詩如圖慨予

何以慰馬癖空對駮駢并駒駮唐家自得王毛仲一時下乘千
金重此圖卷却勿浪開旅藝日日宜矇誦

悼彭侍講先生

江右才名東髮知商家三俊用何遲鄉賢忠節心相契古作雄
深力獨追僻宿雲昏愁永夜瀟瀟石潤瑞多時潜然一掬臨風
淚誰說東坡只哭私

秋夜彈琴作醉翁操

偶彈醉翁操載誦醉翁吟齋居當月夕風露正盈襟誰云在城
市而獨非山林似聞松風起吹落古澗陰澗水相和荅琅然有
餘音神游幽谷底步入瑯琊深翁貌殊秀偉幸哉見于今挂壁
有長圖山林氣蕭森高人多古意亦復彈吾琴紛紛流俗外誰

識此同心

時陳玉汝以所藏朱澤民
松溪琴士圖索題遂及之

與原已過玉汝半舫齋看月時八月十四夜

錦袍寒重未成眠飛蓋西園又一年桂魄強論千里徑人心猶
待十分圓天低韋杜看逾近夜久奎婁坐稍偏更拂冰絃彈古
調醉翁餘興付琅然

重九日與蕭漢文出游城南

詩家長不負清秋足馬城南又出游霜落茱萸經古泝煙橫首
蒼度高立莫論來歲知誰健還怪前人管蝶愁向晚悠然何所
見青山依舊滿墻頭

再游城南

登高始經旬野景宛非昨園空秋葉深山淨寒雲薄清尊喜共
持破帽拚重落日暮淡忘歸黃花翳孤壑

送僧道菴游五臺

頭白吳中一老僧，慣將雙足付峻嶒。如今又向五臺去，此是諸山最上乘。

謝孔昭臨黃大癡畫

大癡道人避世士，移家舊隱虞山重。蒼生能畫老入神，落筆虞山宛相似。深林依稀村塢重，水口近與昆湖通。高岡硯碓勢欲墮，此老前身黃石公。百年以後誰其亞，昔者吳門稱老謝。案頭臨畫似臨書，咄咄逼人真可詫。風流前輩杳難攀，謔語空傳謝疊山。窗中遠岫依然在，天際春雲仍自還。

孔昭善寫山自稱謝疊山

陶靖節歸去來圖

搖搖輕舟曖曖故里陶翁歸來僮僕咸喜柔櫓將停長纜斯理迎候者誰曰維五子舒宣前拜繼以阿端雍佟傍門翟氏整冠家人相見孰云寡歡督郵何人縣令何官治我三徑謝彼五斗

束帶則難荷鋤何有力耕雖勞賴有濁酒一杯對持田父我友
歲荒乞食翁則不貧葦門柴車素琴葛巾孤松可撫高柳可薪
佳菊可采幽蘭可紉使翁乏此中亦自樂樂夫天命而無愧作
白雲遥遥懷古有作班廬既返斯語自昨兩晉文章惟歸來篇
畫史運筆丹青乃傳王室終燬相門獨全荆軻之詠又孰傳焉

悼張亨父

詞林何事失斯人不見風流迥出塵昨日退朝鞭共舉他家聯
句墨猶新棺停舊舍魂歸遠車過長街腹痛頻無力能為孤寡
計題詩聊復報關津

詠邵文敬所藏轉刀

鑠金巧思出工倕獨抱機心展轉危報主义知深自許授人難
辨倒相持筆端字悟藏鋒妙囊底錐嫌脫穎遲詩社埋頭羞銳

進吳箋一割尚差差

詠湯姬

笑汝皤然似一公窮冬相伴勝房空三緘口不思援上九轉腸
應為熱中詩詠懷春同少女禮云當夕稱衰翁平生知足渾無
辱不恨孫弘布被蒙

次韻答賓之作書戲效拙體

書家新樣出眉山若擬丰姿定玉環硯沼百坡空對影管城一
孔但窺斑斑臨模惡札勞唐楮結構奇材得魯般此意亦知聊戲
我試看攬奪語尤頑來詩小序有勿怪攬奪蘇家行市之語

再答

西臺退筆塚如山魏晉書家盡轍環長愛弱毫能瘦硬戲將濃
墨故爛斑物知久假非真有師出無成定早般般與班同趙充國傳般師罷兵

來詩後題曰行
且還故步矣
歲暮百篇期和答莫辭呵凍手偏頑

三答

蘇墨穰穰滿屋山宿緣疑是手探環馬形始悟當書尾羊鞞無
勞強索斑屢屈漢庭陪絳灌遠輸齊粟荷姚般社中一笑同游
戲三絕君仍有絕頑

四答

春風初起到燕山書客朝來喜賜環詩陣且教旗正正朝衣空
浣墨斑斑廉頗謝罪宜先闡趙鞅行軍已殿般只尺西亭還故
步雪當獨立愧疎頑

五答

都下才名李義山詩筒相送幾循環寒蛩入戶聲初咽拙鳥成
巢羽獨斑聊復據鞍如馬援不因奪邑愠剗般壯年已受書壇

戒幸少童心莫比頑

次韻答謝于喬送石首魚腊二首

腴腹無勞重剖開依然尺素喜偕來野人頓頓宜常食甲第紛
紛自滿堆雪裏作羨誇道韞病中和粥慰僧鬼佛經云比丘有疾可以食之

相逢舊是煙波客興繞江湖句易裁

筠籠擎送手親開片玉遙從海藏來自取剝膠膠獨餌周禮魚餌若

教駢首石成堆名傳詩客如通印力盡漁工學背嵬楚俗未知

鮮食美莫臨陶鼎索新裁答宿之戲

答于喬次韻謝送冬筭

西郭清風棊野開門前俗物敢持來聊供香飯抄雲子為想長
饒斲雪堆空腹冷含金瓊碎壯心未怯玉崔嵬知君能畫非饒
守乞與鵝溪絹剪裁

又答賓之次韻

吳船送泝雪江開曾遶筓篁谷口來鹿角幾時林下解蒲芽何
物市中堆小盤朝送情偏雅巨室山裝勢亦嵬人說孟宗多孝
感北堂供饌手親栽

時賓之母夫
人初病愈

謝馮佩之次韻送鹽筍

槌竹初疑一束開齒牙還辨越船來囊盛藤子新題帖飯煮芹
道漫作堆興逐先春風味勝功收斥鹵雪花嵬任渠老硬相評
品未許伶倫當管裁

鹽筍老硬為
賓之所評

答于喬再次韻送魚鮓

晴窗裹鮓帖初開碧碗紅鮮入饌來禮尚右腴空古制食宜方
丈向前堆舌端漸覺香膏美齒上頻驚脆玉嵬東海任公今謝
傅六鰲須為一時裁

次韻謝凌季行送新釀六尊

寒掩蓬門午不開東鄰新釀叩門來黃封內法何從授紅印他家自滿堆飲量笑添清澗潤吟肩醉聳玉山嵬青州舊例今重舉從事多能未減裁

飲于喬家以端硯聯句畢復拾餘韻

披雲離北巖度嶺入中夏飲水從溪漁過都傾市賈氣陵松滋侯姻締雪濤姐重藉剪楚茅方函鄧川椹津津剖馬肝澱澱摸羊觥則足恨蹒跚仰唇驚甜開守黑面豈黥含貞口終啞靜維有壽焉玷尚可磨也魯史紀獲麟晉帖題褻鮓供給到唐文護持等商掌眉形空愛纖風字仍嫌哆却立敢摩肩樓行當出跨載觀七八評重補六一寫取友必于茲舍渠總其亞器隨詩銘傳人當碑刻打巖韻拾子遺微才任聊且

抱翁家藏集卷第八

范翁家藏集卷第九

詩五十一首

辛丑仲山自寧陽回過宿同朝正旦

齊魯分司地三年不負知過門多舊話下榻又新詩曉日瞻鸞輅春風集鳳池聯班同拜舞鷓鴣喜肩隨

次韻李世賢齋居見懷時予病目不出

飯罷齋居撤紙屏定知踏月步空庭上林此夜歸鴻落後圃何年睡鹿醒劉保齋為院長時嘗于後圃遊鹿綵筆淋漓分曉露玉堂突兀帶春

星高情只尺勞相望思繞西山萬疊青

夜坐懷齋居諸公次前韻

布衾寒擁對牀屏鵲遶南枝月過庭瞑目誰除童子障齋心自比太常醒花時漸好仍籠霧燈節相催屢問星俗傳元夕晴物八夜看參星

便有玉堂天上意銅鑪當菜冷烟青

次韻鼎儀世賢問予病目

藥裹長隨老杜居全憑坐客誦方書巖前激電空聞爛屋上繁
星頓覺疎遙望未能知匹馬不祥幸免見淵魚詩家善謔坡應
爾旅館清齋澤也如似說北門春色近試分東壁夜光餘煩君
漫舉盧仝事此事非予却是渠

時王汝得子
誤以見戲

賓之鼎儀以前韻倡和句有及予者答之

十日寒窗嘆索居案頭空積故人書屢親藥物青囊近乍免朝
儀玉珮疎春到能言慚慧鳥日高猶瞑羨鰥魚陰鏗句法何人
得陸贄才名後代如獨恨無譏非鄙下尚留遺韻豈周餘心齋
不比身齋者誰識清宵夢石渠

喜蘇御史還朝

昔報分司御史歸曾聞父老共歔歛江南列郡同三輔天上群
星有太微白筆手題封事滿赭衣人立訟庭稀周家擬用蘇司
寇只尺威顏定不違

寄壽陳棊軒五丈八十

天南永夜壽星孤盛事新傳自古吳長巷鐵瓶依甲第廣庭絲
障擬蓬壺山花似錦爭來獻春酒如澠不待沽王敕早封周柱
史蒲輪遙載漢經儒雲霞蕩影連華屋鸞鳴分行峙碧梧離席
旅酬期客醉當階答拜却人扶康寧無恙應僊骨儔敏同胞亦
美須帶索總誇三樂在將車猶憶二難俱歸然鄉里靈光殿久
矣丹青范蠡圖杖屨未能隨父執衣冠獨幸接師模廣成千歲
從今致晏坐棊軒看織烏

送周希正教諭赴嘉祥

心繫慈闈裏名題乙榜前治裝初北上奉檄又南旋得祿家無
累橫經席可專此行應暫屈拔擢在他年

題雜畫四首

策杖何所適高歌度林丘青山餘興在三步更回頭
昔觀水村圖長愛趙松雪只尺真宛然人家倚丘垤
雪湖清可游欲往乏艇子誰築臨湖亭寒波動窗几
水雲同渺然細嶺空翠色憶在太湖東弁山恨相隔

送劉時雍職方使寧府

面承天詔下蓬萊路指江西巨艦開持節總行藩國禮按圖
兼試職方才錦袍明月神僊去畫棟飛雲帝子來河漢莫勞瞻
望久星槎秋近却須回

憂旱

雲漢詩人詠刪餘見聖經民情方留質天道豈冥冥赤地連秦
晉清流涸內涇端愁禾種斷久待麥苗青竟日瞻雌霓中宵問
畢星近郊仍太甚當寧不遑寧丙枕勤圖治秋臺緩用刑省躬
曾下詔逆耳遂俱聽好雨當驅馘狂風預殺螟小臣期入賀志
喜更名亭

王叔明村舍圖

田間雨過騎秧馬箔底煙生餒火蠶偶看王翁村舍景悠然午
枕到江南

送顧希遂劉以規赴遂昌縉雲二縣令

路指天南處士星聯車清曉發都亭漢家循吏應同傳孰堂

前戒石銘

吏部曾摘戒石銘
二語爲題試選人

希遂持栢子庭古木圖求題爲其尊翁壽

老僧作畫真遊戲不向繩牀立文字禪餘捉筆掃生絹王宰胡
為獨能事槎牙古樹形甚奇疑是蛟龍傳雙翅雲蒸霧湧不可
羈條爾卷之藏畫笥亦知社木非不材全此天年皆自致石罅
盤根意却甘檳棘任渠生滿地海虞顧翁隱者流有子敘成爲
縣侯翁今年紀過八十頭白人間無所求日長抱孫坐堂上右
手尚能持酒甌試題古樹爲翁祝遙與莊子論春秋

久旱偶讀王半山暮歸一首感而次韻

八月不雨天冥冥宿麥半死黃兼青雨師出游風伯阻半道執
轡車還停天門萬里欲往扣關人辭謝言誰聽盆池養魚真戲
爾勺水亦復揚清泠洛川迢迢不救旱川神微步誇娉婷安能
輒之灑九土一唱吳歌搖越舲

送陳堅遠

杏園事落莫已過燕都春有司愧淺陋使子志不伸銓曹重縣
令謂此民所親終然被簡拔去慰黔陽民黔陽在西南地與川
蜀隣茫茫沅湘間曷置子一身 朝廷不忘遠一視同其仁遠
人德乃服勞子以撫循子昨來都下本作觀國賓買屋柴市南
地偏避車塵十年艱旅食家人總訢訢我數往扣戶子輒起正
中清談盡款曲書畫復前陳客中易交結何人最情真如子兄
弟賢氣力安能振庶幾年尚壯美玉終難湮洞庭木葉下水落
當知津扁舟逐去鴈悵望遠行人

送沈良臣

家有宋高宗書良忠堂扁

杏苑春風後車塵帶落花儒衣初出郭御扁舊傳家易許丁寬
講詩從沈約誇扁舟明日路江上暮雲遮

種竹

人間此日六月六獨臥北窗避暑溽起來手校百家書種樹新
編存舊籙今朝種竹云最宜況是淙淙雨初足城西佛寺許見
分亟往乞之休待促泥塗十里何遥遥健步携筐馳兩僕叢林
夏半放葉稀新筍纖纖簪琢玉雨餘荒砌更旁尋土潤長鑱還
易斲入門便作摩戛聲眼中遂有篔簹谷連年生意殊寥寥淨
掃虛庭無寸葉此君與我多宿緣不鄙閭官故臨辱長身嫋嫋
凡六輩瘦骨稜稜纒一束淺深稀密種如法更記南枝水頻沃
清風屢爲拂縑塵何異振衣新出浴翛然搖動久參差墻下疎
陰散朝旭詞人果客會登堂預傍詩壇建牙纛素餐語陋歌伐
檀多識名慚收采薺青春高宴桃李園尤怪謫僊銷夜燭好來
此地倒壺觴安用他家置茶局日高相對欲忘味一任連毛并
脫粟長慶詩中紀似賢白傳名言斯實錄敢作尋常草木看造

次下堂猶整懔平生求友益者交勁節虛心盡忠告豈學尋常
稽阮徒散髮昏昏困醺醪因懷舊隱關小園一箇茆亭四圍綠
坡僊爲我製詩箴楣上分明揭醫俗扁鵲徒聞藥最神平居肯
費黃金贖醉眠欹枕石牀危放步曳筇苔徑曲中林慣去復慣
來鳥獸相忘免驚觸場開町疇伏麀麀巢接柝欄哺鸚鵡燕都
再住又三年俗病誰醫日憂篤北地高寒木易凋難同吳越兼
閩蜀不圖致此到吾廬信是此君多眷屬春來雷動擇龍行尚
憐地窄身蹉跎鄰家隙地半畝餘久矣棄爲牛馬牯適來見售
教掃除歛見疎槐陰繁蔕古井西偏糞壤平移種終當操畚揭
溝澮循行防旱乾雪天障護從較疥猗猗如篲且如包放出千
竿愜吾欲邵家舊例倘可攀小結行亭工自督交游倘識匏翁
情昔者詩篇煩再續

寄李貞伯

金母橋頭置隱居近來清思復何如
遙知舫趁風吹盡燕子催
人好束書

送吳德徵

溽暑宜多雨南行又見君
開尊臨積水挂席帶疎雲
片玉崑山出清風建業分鄉邦
爲別意投贈媿無文

史館偶作

天闕何巍巍脩廊接高閣
冠珮相追隨何曾歎離索
值此夏日長深居淨炎歊
仰慚昔人言兼有天人樂
泛觀百氏書得意時一喙
新水漲玉河流雲度朱箔
農家望甘雨緣知夜來落
階草回枯亥盆荷承嫩萼
欣欣耳目間群物俱有託
安知宿來多空孰與求
民瘼悠然發孤詭薰風動
簷鐸

與李世賢游月河寺

春闈濫校文喜與子為伴匆匆三試餘文卷總堆茶久覽不成
眠朝披遂忘盥當其忙迫時往往至達旦倦甚復醒然長鳴老
鵝亂地與門鑰分人從僻鍾喚空庭豈不廣欲步足如絆謂當
撤棘圍償勞藉游玩人事各紛紛詩社盟屢叛荏苒入夏來仰
天復憂旱及茲得甘雨行潦且瀰漫天氣今特佳陰晴料能斷
駕言出東郊尚趁季夏半緩行乏肩輿低載維欵段僕夫請所
之聊循月河岸野寺雖荒涼當門有奇觀雨後流泉長絕勝冰
始泮危亭合清陰締綌也須袒兼為河朔飲酒到請勿算馬上
談新詩先此發一粲

送許墳還東陽王允達督

浙河昔枉棹千里來吳中茅堂乏延欵脩竹維清風愛子脫流

俗死然如婦翁信哉得許劭因之想王通當時既別去傳聞學
彌工固應領鄉薦名姓登南宮我重為子喜仕路今方崇却緣
感霜露一臥春闈空有司幸藉口弗駕車虛攻被褐出大學伏
暑憐未終過我復告別仍遠浙河東都門雨新霽晚天見長虹
津頭水勢盛趕岸宜孤蓬遥遥八華山翠色高隴從讀書有舊
隱績學期成功三年藿上鷄一日雲間鴻

次韻寄潘太守琴

閩南闕政賴君修吏治評來漢代優民有田疇歌召杜士能經
學比程仇乞身豈為浮言動去郡惟將故事畱未老一筇端可
却自臨溪足與山頭

送秦廷韶改守建昌

京塵漠漠愛樓居臥看天街雨脚疎詩擬前人知可到史修循

吏許誰書倘開東閣應先入暫守西江亦美除試向新民談舊
政三年化及武昌魚

送潘粟夫僉憲提學四川

豸服初成訊五紘西行兼得里門過漢家暫託文翁事蜀道休
聽太白歌諸老詞章惟故郡頻年交誼共賢科雪消三峽江流
急定擬將詩度旋渦

彭文憲公挽章

館閣先登寵渥全名齊東里繼鄉賢史家房杜功難錄文苑歐
曾法獨傳四海日長依化國九京天遠隔重泉後生三載相從
地坐對薇花欲泫然

王成憲席上賦火肉

竹煙冉冉暗中浮佳味誰將製法求熊掌不勞重宴客羊頭何

用亦封侯黑髻彷彿逢公子白躡分明出婺州飽後厨人還細
聶一盤紅玉薦新芻

分題習家池送侯僉憲

遭時爲漢官佐憲游楚地偶過習家池還詢山公事遺音有歌
童倒載亡歸騎後世愧高情徒然効沉醉

送祁至和參政還湖廣

赤墀憶共接班行當日君猶作正郎久向江西參政事又來闕
下沐恩光三年考績因虞典千里提封過楚疆秋滿都城臨別
意只將詩句納行囊

送蕭漢文貴州僉憲

連宵不省是離筵空喜當軒朗月懸男子出游須萬里大夫能
賦已千篇吏曹薦士知無忝王事勞人信獨賢坐待高秋天氣

爽好懷遠託鴈書傳

爲邵日昭題荆南春曉圖

尚書高公成絕藝二百年來許誰繼愛此荆南春曉圖霧雨濛濛濕青髻邵君讀書富萬山誅茆結屋纔三間深林卓午日光漏猛虎猶能窺一斑

東駕問陸鼎儀之疾次韻羅洗馬傳校書

廿年翰苑舊儒臣簡命東朝進講頻病體臥來聊假日
睿思傳到旋生春尋常賜食當前席只尺登瀛迂要津想見
幽懷多感激秋宵無寐望儀宸

野步圖

山風不斷鬢毛涼誰掃迢迢赤岸霜莫怪回頭三步裏石林端
可坐焚香

送李若虛

浙中妙山水造化夙所置美哉聚千斯千里一畫筇行觀與坐
閱舉筆皆可記其間多詩人良亦山水致李侯豫章產詩骨稟
尤異決獄最屢畫豈不稱法吏苦吟顧無俦自謂性偏嗜騎馬
長安街推敞見詩意終然胸中奇抑鬱未能肆擢官副外臺偶
在兩浙地階庭列儒生案牘積文字多暇仍出游茲惟愜吾志
撲硯饒清暉新題翻目試寄與藍田丞吾仍有公事

送陳師禹提學雲南

萬里行行馬獨前外臺仍喜得同年

物擬蕭漢文不果

路開六詔連車

轍業講諸生對簡編缺豸冠高還自整碧鷄祠古漫相傳兩張
條約曾親見願向遐方繼昔賢

崑山張節之華亭張時敏近歲皆以副使在師禹省中爲提李

稱首

送蔡太守赴南寧

五馬齊驅雪蹟深，除書新領荷綸音。
地偏正倚西南事，天遠須懷只尺心。
陸績清名惟載石，蔡邕高調豈彈琴。
春風驛使應多便，擬報諸蠻總獻琛。

為徐仲山題虎丘觀泉圖

徐子昔年官水部，匹馬蕭蕭歷齊魯。
運河水滿萬艘通，汶泗交流無壅土。
歸來泉志手親編，好與河渠書並傳。
不識當時陸鴻漸，齒牙空味虎丘泉。

題汀州忠愛祠

閩南初置千夫長，鄧賊乘機潛聚黨。
一朝變起沙尤間，山谷群蠻應如響。
竹鎗紙甲銳且堅，白晝橫行爭擾攘。
盡驅壯者入寨中，忍見寡妻啼道上。
列城有警朝出兵，府庫大開懸厚賞。
賊徒

失計漸誅夷流血成川歸洗蕩守帥何曾論脅從刻日搜山當
不爽軍門有令誰敢違汀州推官獨稱枉推官在州十八年獄
空有頌人曾傳寧將一身與賊死身安要與民俱全紛紛總作
邀功計道路所獲皆牽連下車解縛焚簿籍似此活人知幾千
臥龍山下陳牲醴民欲祀生翻祀死千年何以表赤心中愛煌
煌有題字獨憐仕路終府僚報德茫茫嗟此止豈不聞王堂謝
學士閩人說是推官子

送張兼素

北河冰合滯方舟來作京華兩月留公議在人書上孝壯懷千
世抱先憂旋歸幸慰斯民望撫字勞從異日酬握手不誇春榜
舊南雍風月久同游

答兼素次韻留別

南去難同郭泰舟客樓密雪故延畱來朝初考虞廷績出守眞
分漢室憂已似往年重惆望可能終日逐賡酬春風遠召還堪
慰聯珮相期鳳詔游

次韻傅曰川病中

歲暮偏驚客過門方書時與國醫論節拖凍雪當松院屋背方
塘類水村日糴五升知貴賤月收一束問寒暄杜陵詩句依然
在想見微吟對淺尊

游朝天宮

撲衣塵霧入門消脩竹奇松步屨遙紫府新開延日月碧臺高
築倚雲霄城頭瑞鶴招還下海上枯槎坐欲漂為憶僊家爛柯
事手摩石刻是前朝

原已邀賞雪

乘興誰移雪夜舟
清晨書札喜相投
極知今日三宜賞
繇已亦愛前人四
即休臘粥餽餘猶宿飽
時為臘月九日
春醪傾滿更新蕩
回瞻玉宇高寒處
快馬何人自軟裘

追和葉文莊公喜雪

都人舉手荷堯天
不用書雲更卜年
覲未曰消應待伴
霰維先集似爭權
作勞願附三農後
志喜誰誇十載前
獨坐南窗紅日滿
敢辭磨墨製新篇

觀奕

高樓殘雪照棋枰
坐覺窗間黑白明
袖手自甘終日飽
苦心誰惜兩雄爭
豪膺欲擊形還匿
怒蟻初交陣已成
却笑面前歧路滿
蘇張何事學縱橫

次韻邵文敬對雪

酒力難勝夜氣嚴
研池水涸咽銅蟾
客居燕趙驚初見
歲在壬寅信可占
棋士手輒猶對局
詩人齒冷欲停籤
北風作陣斜窗白
吹滅銀燈坐未厭

哀蕭漢文

吾鄉二年間人厄何屢
見生者若晨星死者如激電
張卿當壯年疾行已云先
交老俄繼之身後誰去真
楮子遠召來喪舟遽南旋
安知吾漢文策馬奔復殿
異哉難重陳此事真大變
漢文少也孤惟日親筆硯
既壯登甲科世故嘗屢諫
工官亦甚勞精勤素無倦
仕優兼好文提李首膺薦
終然剛直安此輩方悃悃
遂成負錦詩側席阻深眷
幸爾賴聖明不失外臺選
一時重負名遠去人反羨
明儕置別筵我數獲陪宴
席間雜珍肴獨怪強下嚙
被病蓋已深憔悴見顏面
杪秋城東隅聯騎爭往餞

舉鞭大道間欲別仍戀戀孰期驅征車稅駕勸餘轄計從南使
來交游走相唁客居地苦寒放牖放朝覲念舊涕淚零雪後還
集霰嗟惟茲四人在朝普吳彥其一吾同官其三自同縣漢
文死差強故宅歸偶便獨憐鍾鼎才墮地成破甕歲晚魂茫茫
有手恨莫援呵筆一寫哀聊爲故人傳

匏翁家藏集卷第十

詩五十五首

壬寅正旦侍班

爐烟如霧藹彤墀半啓金門複道危只尺星辰華蓋轉中間日
月袞衣垂普天鳳曆開寅歲平旦鷄人報卯時 御座不勝袍
笏近侍臣偏識漢朝儀

和傅曰川以病止酒次陶韻

古來曠達人有酒誰肯止忘憂惟藉茲況在痰疾裏此事陶翁
然豈意至吾子不知翁作詩聊以詩自喜使當呻吟時得酒蹶
然起所以謂濁醪其中有妙理匪獨藐二豪既醉且忘已美酒
與惡石去病殆均矣但嫌過飲人拍浮渺無涖會將二鹵陳稽
首致禋祀

再和

閒居發深思欲止無所止幸哉此頑軀不落詩酒裏止詩昔李
侯止酒今傳子而我處其間漠然無愠喜所止誰尼之旋踵興
復起不如不止人二事能料理古人尚少真俯仰孰知己緘書
報陶翁我止乃真矣春服不待成駕言玉河涘未下孟郊拜豈
曰杜康祀

分題百步洪送顧工部

長河勢屈曲學海遙之東瞬息瀉千里滔滔若無窮忽然經彭
城怒發何其雄千艘相上下往往驚篙工昔聞入蜀險殆與三
峽同行人舉足計聊號百步洪此地山繞路微禹安能通鑿石
尚存磊磊急流爲磨礪噴射聲愈振石腹疑中空嘗登戲馬臺憶
羽能戰攻自誇重瞳子不數隆準公長驅八千人氣撼沛與豐

餘威付此水叱咤猶生風美哉河渠使來往殊匆匆水利歸上
國期成疏濬功月夜披羽衣清嘯黃樓中下視瓠子河枉築宣
防宮

送汝行敏

共挹清風坐竹林吳門相見到于今
又聞池上揮毫手未怯天邊倚劔心
考績最高楷士論分司多暇註官箴
馬頭送別還長嘯不減孫登鸞鳳音

園居初成次韻李賓之見過

扣門遙過我夏日更勞公小屋聊方就
清尊幸不空畦長連古井樹老映疎櫂
歸騎休催整追涼騰晚風

觀製雨窰

作軒未料宛丘長簷下增修匠石良
坐倚前楹天忽遠步當平

砌午偏涼白雲就宿看逾穩急雨來催信不妨敢與蘇家論擇
勝半間難遣十夫將

題浦氏兄弟中秋賞月圖

月臨嘉樹不成眠夜半中庭忽短筵率爾盃盤聊草草闕然簫
鼓却闐闐荀陳星象空相應王謝風流亦可傳玉季丹青無有
引盡將秋興落華箋

和胡彥超過園居

三畝幽棲地新詩枉孟郊高題無鳳字拙構有鳩巢委巷重勞
問衡門也用敲一尊聊奉款親手破霜匏

次韻陸鼎儀過園居

開門小圃思悠然敢與陶翁較地偏此日便教懸木榻誰家却
去坐瓊筵藜羹韭餅直能具菊本瓜苗早已擥徒步相過應莫

厭只愁東郭履先穿

和王允達病中雜述

日午畏新暑步就疎槐陰清風颯然至當此一披襟閒居任寥落而獨懷同心入夏阻良覲荒園變鳴禽懷哉久在告幸無官事侵口吐陶韋句時將代呻吟向晚有奇事忽此金石音平生
在學道富貴安能淫青巖舊隱居興入煙嵐深微詞寫雅趣展
玩良足欽峻嶒聳詩骨悵望西山岑

分韻得肅字送林朝信

十年載法冠能使百寮肅共瞻風裁高鷓班聳孤鶻平生獻替
心奏草惟自讀 聖皇記老成昨喜批薦牘議從吏曹公初

豈假夢卜輟君副臬司萬里騁遐躅章服增煌煌金鏐映朱襮
雅志在澄清姦邪首仍觸昔聞走豺狼今見螫蛇蝎團團八桂

林得此一枝足薰風吹雙旌欲渡江水綠餞別雜交親天氣適
炎燠酒闌棊槩喧醉墨已盈軸羨君有茲行書錦非所欲實惟
家慶全樂哉難具錄

為王希曾題啓南長蕩圖

吳綾八尺餘遠勝好東絹坐移長蕩來歛向眼中見按圖想舊
游巒嶺非生面陽山踞獨尊虎阜奔而殿柔櫓一搖槳船頭翠
痕轉春水澹若空白雲故多變佳哉吳中景獨許沈郎擅典客
方壯年孰云宦途倦吾志每圖南欲趁秋風便幽深付一筇此
樂人勿羨

次韻答同年邵汝學約過園居

觸熱相過敢憚煩會呼童子掃蓬門俗流未許通車馬年契長
期到子孫已擬置棊石木局旋教開酒擊泥尊荒園半畝清風

足他日應消楚客魂

二答李士英

堂成巧者更相煩，只尺墻東別置門。
長願清風分故舊，獨尋芳草憶王孫。
士英出唐宗室後楚人預約空詩帖，吳客難言乏酒尊。
荒徑寂寥春去遠，倚闌還用弔花魂。

三答劉道亨

坐待劉叉洗熱煩，雪車冰柱早臨門。
自憐學圃空稱老，誰似登堂累抱孫。
杜子刈葵蔬入饌，陶翁收秫酒盈尊。
奕場莫謾誇能事，高着還當惱醉魂。

四答胡彥超

園丁頻遣愧勞煩，菜蘢清陰已滿門。
車過陳平多長者，官如胡質有諸孫。
小堂定擬虛中席，內府初停給上尊。
翰林每歲五月至九月例不給

酒不怪連朝風雨惡暑天真爲洗詩魂

五答李賓之

菴居聯詠舊曾煩詩令巖來豈棘門欲繫苦匏同賤子

李有詩云菴居

如可借吾亦繫吾匏

每誇僂李得賢孫過街莫放追風驃

李嘗對影須開

問月尊不是葛洪川畔路李源休覓舊精魂

六答楊應寧

池上揮毫思不煩忽傳詩句到柴門官聯賈至稱中舍字許楊
脩識外孫西郭向人空折簡東堂延客已開尊杏園舊例推年
少風雨孤村莫斷魂

對萱花

萱花映叢竹顏色殊覺佳新雨濕還重薰風吹復斜不嫌開易
落一日仍一花歲晚竹當茂無令人獨嗟

送仲山後坐通法寺西軒

是日名其園曰雷泉

歇馬東城下緣堤踏淺沙長因送客日數得到僧家灌木陰三
畝奔泉響萬車晚來簷溜斷天際散紅霞

送郭翔鵬進士知福寧州兼寄州倅馬庭簡

閩海遙遙獨置州忽看秋水動扁舟暫為魏闕三年別定向吳
門十日畱

其兄為蘇學教授

甲榜尚稱新進士雙旌已作古諸侯公餘

獨恨詩筒少為謝同官馬少游

園中晚步戲作

晚涼散步清陰下一樹古槐當廣廈畦間雨過井水渾牆上煙
凝日光赭病來一月不朝參名姓在朝身在野要知未許吾獨
閒舍有閒僮廐閒馬城中塵霧漲天高披襟誰是同游者果然
此日是匏翁昨種苦瓜今可把

題顧定之墨竹追次虞邵菴韻

蔣洪勳藏

林間春雨過亭午葉初乾如與幽人對
翛然貌獨寒傳神者爲誰顧老從後起不及湖州文猶勝薊丘李

畫鳳

鳳鳥久不至曾致宣尼悲獲麟尚被殺不至亦其宜去周二千載見者今爲誰徒從書傳中強爾分雄雌畫工五色筆點染毛羽奇不須舞簫韶展圖即來儀高岡豈岐山獨立迎朝曦噫噫更嗒嗒又即卷阿詩遂令後世人如生舜文時我欲走四方按圖往求之膠東與北海恐有漢鷄遺不如求之人徐庶或在茲百年方承平鳳德宜未衰寄語楚狂輩高歌獨何爲

送沈晉州林美

賢名曾是故鄉聞壯歲高科靜不群坐上誰爲黃叔度榜中吾

愛沈休文鞭蒲此去猶無用符竹從來豈易分吏散午衙公事簡定將書史對爐熏

秋日曝書偶閱常蘇州集

白日落未盡竹陰滿前除翛然暑氣退高簷當雨餘新松無悴色萱花亦已舒偶觀草木性中懷一欣如脫帽被塵葛庭際方收書愛此韋郎句把誦意踟躕焚香更掃地適喜中堂虛累月猶在告深慚此閒居

送僧永岡歸吳住白馬寺

石縫梅泉一縷清早年依此學無生紫藤垂塢人迂步白馬馱經寺得名法席坐揮樓拂短官河去上木杯輕山中試茗何時好擬借禪房折脚鐺

送丁鳳儀

解裝適新秋淡旬指堪數俗事各匆匆雅客未重覩愛君產南
都樹立弃衆取高情薄雲霄清氣填肺腑嘗聞策蹇驢徑詣大
江許天寒無一事獨看雪花舞維此一段奇替人可爲伍信爾
趣尚高佳句隨口吐作官不出鄉且幸居北部往來湖山間吟
興不曾忤舊臺悲鳳凰遠州擬鸚鵡所至必畱題錦囊有詩譜
此來非好游聊復較官簿客居大不堪眯目滿塵土掉頭倏言
旋頗類孔巢父水路涼思多船窗靜揮塵何處落孤帆夕陽帶
疎雨

送林克冲給事使暹羅

鳳詔初從閣下裁僊郎遙向極南開林回早棄千金璧陸賈方
施萬里才滄海雲帆知幾轉島夷卉服定偕來已判天闕三年
別還待星槎八月回

赴李世賢賞月

岸幘披襟素影中
施牀列坐短牆東
月宮桂樹依然在
人面桃花已不同
去歲此會
有蕭漢文
巷陌曲當塵
空遠酒杯涼
沁露華濃夜深
忽作掀髯笑
猶喜論文興未窮

雨中與李貞伯沈尚倫諸友過隆福寺

步來禪榻畔
涼氣逼團蒲
竹雨簷前亂
茶煙林下孤
乘閒携畫
卷習靜對香爐
到此忽終日
浮生一事無

僧舍對竹

老禪趺坐處
疎竹翠泠泠
秀色分鄰舍
清陰覆佛經
蕭蕭日暮
雨曳履繞方庭

張來儀楚江清曉圖

江州失守遺空宅
避難來爲吳地客
當年北郭擅才名
若比唐

人是張籍社中四傑知爲誰揚炯徐陵暨高適感時撫事相倡
和歲久家家有詩冊吳地非無祿可千直氣填胸羞枉尺筆端
獎借意何深試與七姬題墓石幸逢世道輯干戈山谷遺民總
徵辟自信容臺不負丞初行重典難迺責炎荒不及江流清懷
沙賦就髯如戟傷哉社友誰復存雲上孤墳少松栢蒲陽朱君
游宦來得此橫圖殊愛惜登堂示我實失驚展卷茫然爲離席
此老能詩夙所知丹青豈料居高格米狂餘事已盡傳王宰何
人敢相迫墨痕流動淡且濃紙上斑斑皆手蹟日光雲氣蕩欲
開最愛層層楚山碧竹窗疎雨助新涼坐我扁舟沿七澤更將
八詠當棹歌直下龍江酌僊魄

畫中每段有詩凡八首

諸友賀予新堂有聯句數首楊惟立以疾不赴他日徧

和其韻因取末首和而酬之

任渠府謁更臺參曉起微吟帶宿酣尚憶小堂虛左席忽傳新
墨滿方函連篇且爲從頭數隔巷真如對面談後夜只畱滄海
月待將餘興付東菴

謝李貞伯送瓦茶爐

搏埴功成上短筵茶香酒煖盡相便送來陶鼎風斯下移近寒
屏火始然巧匠刻銘依古制才人聯詠費新篇却憐吳地官窵
徧深幸遺材出萬輓

送傅曰會中書告病南還新喻

錫宴瓊林識醉顏盛年文采映朝班竝游鳳沼鸞坡上總在金
昆玉季間楚產向來非北學漢官初許暫南還詩囊藥裹行裝
滿秋興先歸閭皂山

與李士英過王鴻臚鄧村別墅看菊午憩洪恩寺二首

步入南園亂菊叢霜餘籬落淡秋容朝衣欲解寒香細醉眼頻
楷秀色重李愿他年須共隱王弘此地正相逢誰誇九日龍山
會千古風流接舊蹤

城南韋曲路非遥游客逢秋不待招已過菜畦還柳市不勞月
夕更花朝鄰僧乍許分禪榻田父那嫌借酒瓢萬木號風平野
濶晚來欹枕聽江潮

原已宅賞菊

休從雲外望天香誰似蕭然林下粧嫩蕊漸成黃面老低枝猶
比白衣長曾隨枸杞添風味却笑芙蓉住水鄉詩社清忙今又
動看花直擬過重陽

送邵文敬知思南

萬里南行秋氣深却因畱別費清吟書家已擅臨蘇手仕路俱

懷易播心折桂石城曾作伴文敬與子同鄉舉種椒淮浦定成林文敬分司

淮南時嘗種椒百株召南家世應無忝詩裏甘棠舊有陰

九日諸友過園居小飲

久拚秋盡有清忙籬下依然萬點黃休說滿城風送雨端愁今夜露為霜飯隨鄉俗駝蹄短研入詩筵鳳味長願得他年身共健故山歸去醉重陽

次韻酬蕭文明

尺書遙向天南寄秋曉臨窗病眼昏把袂尚懷前日別開緘如對故人言風高白鴈聯群過霜後青松壯節存莫便遐方為久計賜環終許荷殊恩

次韻李賓之觀懷素自叙帖真蹟

法書莫辨贗與真真者一見餘風神吾生苦不解鑒賞猶道此

卷超凡塵少時曾觀聖母帖子石錯比荆山珍風神已乏祇骨
骼邈然陸地望天津囊無黃金可懸購自笑微生常乞鄰此卷
五年凡兩閱手撫禿翁心轉親向來作書總孟浪盡弃舊學從
新春棗函藏弄人莫識李侯知得嗟何因昨來借觀坐展玩始
識半面俄全身長廊豁氣或狂怒細墨垂絲兼笑顰禿翁早受
佛氏戒不貪尚帶癡仍噴觀書得詩吾獲利室有雙壁非全貧
臨摸咄咄付能者舊例乞鄰緣與人

次韻李士英劉道亨過園居看菊二首

詩人渾不厭貧家閒就荒園看菊花傾倒臘醅瓶未罄品題秋
色句爭嘉殘英抱節真霜傑本草言功有日華醉後却勞歸騎
晚西風烏帽數枝斜

天寒墻下見枯桑叢菊朝來未減黃小巷幸違東市遠疎籬能

受北風涼肯因過客開門
嬾賴有呼童洗盞忙日暮
掇英衣袖滿紙屏低擁慢
焚香

次韻顏澄之畱別

朔風吹面到燕南喜報天街駐兩驂
江水長懷曾共飲京塵初拂便交談
作官地偶分南北考績名宜壓二三
歲暮旌門人獨倚過家須着綵衣參

題台人鍾希哲寫文宗儒小像

羸馬空囊貌不寒吏曹重署博平官
他年若赴天書召此幅須畱父老看

次韻陳粹之鴛湖寓居

北來湖上借幽居坐占鴛梁作嬾漁
未許扣門傳隱訣暫忘燒燭治官書
一屢故里爲謀易百畝他年不願餘
花柳滿村初病

起門生誰惜送籃輿

雪中李世賢招觀東坡清虛堂詩真蹟

茫茫巨海流銀沙
光分民舍并官衙
詩人說詩等說法
四坐續紛天雨花
寥寥小巷絕人蹟
誰肯拄杖過吾家
曲中合沓失朱鷺
谷口聯翩多白鴉
青葱搖落上林苑
一夜亂綴瓊瑤葩
故人相送定石炭
惡客好飲惟江茶
清晨忽報有蘇墨
折簡邀看門頻搗
形疑蝦蟆似曾壓
技癢蟻虱誰爲肥
料知刻本來廣右
醉筆漫滅猶堪嗟
坐當大雪發長笑
新酒正熟浮紅霞

是日往觀果刻本蓋世賢招飲恐客不至故給爾乃復

次韻

出門騎馬踏雪沙
玉堂吏散成空衙
何人手剪吳江水
而我目眩梁園花
客居長至歎寂寞
賴有東鄰僂李家
試闢泥尊香潑

蟻却笑石本光翻鴉清虛堂中事已往妙墨零落隨風葩空腸
吹盡元脩菜渴吻煎徹庭豎茶詩成一紙來萬里峒石至今推
密搗濃書鍊把純綿裹深刻蟹上朝泥爬似人可喜非浪語與
客爭觀還共嗟莫言此幅字漫滅夜久屋壁飛晴霞

明日世賢持啓南雪嶺圖索題復次韻

小徑升堂新築沙退朝無事還私衙誰移雪嶺入我屋老眼白
日疑昏花坐游未覺足力倦倏過野店仍山家淺溪舟膠集凍
鴨空谷屨響翔飢鴉狂風入林一攪動零落玉蕊兼珠葩此時
誰掃林下白急欲往煮僧房茶忽然仰面見高寺扣戶還須持
馬搗長安十年走薄宦對此似將塵土爬西湖尋僧天欲雪蘇
子故事今人嗟清虛舊韻更可借捧硯獨無王子霞

為歸貢士題其先曾大父素節翁遺訓後

歸君入我戶手中何所持自云曾大父晚歲有訓詞讀之心凜
凜死與生同時時當洪武初立法張綱維翁也長鄉賦死者皆
等夷避禍行萬里躋險兼履危一身孰為伴妻妾負兩兒或犯
盜賊狠或當狼虎飢道中屢脫死若有神所司艱苦歷三閭恩
宥溥見施終然穩渡江龜卜不我欺本無處世意乃有還鄉期
痛定如熄艾甘回忽含飴享年數近百孫曾美而嬉扶杖登春
臺世道仍熙熙始知百年內苦樂真相資細書示後人微意當
知之吾聞崑人語此翁德惟茲所以少坎軻福優綏期願餘澤
久不竭仕宦方自茲為善必獲報翁也安能私今人處平世逸
居可無為

懷寧二孝子

珍禽或同穴佳木或連理叢爾懷寧城乃有二孝子一邑一人

孝已多一家二人當如何母存共作堂上戲母死誰敢臨喪歌
有母斯有子事死如事生兄孝難為弟弟孝難為兄有司不須
問鄰里試看墓上湧出泉一泓又有紫芝燁燁廿一莖山川發
祥非狗俗 朝廷旌表始稱情欲知孝子姓與名吳氏本源與
本清

偶見元李希籛提舉遺墨乞歸賓之蓋希籛其先世也
因賓之作海月菴記為謝以此酬之

遺墨持歸走僮僕想見開絨重薰沐百年珠玉慨沉埋袖拂蛛
絲光奪目遂令短紙一尺餘價壓書巢三萬軸乞鄰與人真自
慙藝苑酬功百言足夜歸解帶不成眠海月亭亭當矮屋琅然
烏鵲心驚飛月下新篇已堪讀湖湘文種傳一家前有希籛後
懷麓吳人再結文章緣几上分明畱此幅錦囊收貯莫教遲俗

子無知將手觸後世諸孫更好文還向吳人獲珠玉

匏翁家藏集卷第十

匏翁家藏集卷第十一

詩五十八首

送吳令濟赴邵武推官

元師道之後蘭谿人

闕下相逢歎久疎，交游已是十年餘。
科場獨使名終抑，啓事誰將例復拘。
上郡官寮持仕牒，故家孫子抱遺書。
越舲搖動春風急，此樂何如過里閭。

爲李貞伯題朱寅仲小畫

春半扁舟過太湖，洞庭着雨翠模糊。
惟應舊日同游者，愛此朱郎水裏圖。

和陳粹之元宵五詠

鬪鷄燈

坐上初看吐綬紅，夜深童子忽開籠。
羽毛爭訝分明處，烽火都

歸躡躍中句到孟韓猶覺晦力如劉項漫爭雄
獨持一炬當罇俎輸與朱翁善折衝

走馬燈

鏃騎交馳映落暉長戈應藉魯陽揮
真成烽火連三月早築金城已四圍
矢石聲沉堅莫破旌旗影轉疾如飛
伯仁一炬非相戲信落兵家第二機

火花

細蕊紛紛頃刻開坐觀火候亦奇哉
春回玉瑤微微動風定金沙颯颯來
桂子忽從天上落蓮花誰向水中栽
夜庭一霎聊供笑坐客休將見跋猜

粉丸

淨淘細碾王霏霏萬顆完成素手稀
鬚上輕圓真易拂腹中磊

硯便堪圍不勞劉裕呼方旋若使陳平食更肥既飽有人頻咳
唾席間往往落珠璣

油飴

賦滑津津色未乾聊因佳節助杯盤畫圖莫使依寒具書信何
勞送月團曾見范公登雜記獨逢吳客勸加飡當筵一嚼誇甘
美老大無成憶膽丸

送袁德純知宜興

此日公車擬薦賢更教遺愛與人傳郵程却算三千里科甲還
驚十二年吳邑煙花曾有約荆溪山水亦前緣丈夫事業今方
始莫學蘇公便買田

送王允達

群居恒紛紛取友惟莘莘彼無志操徒處世甘齷齪富貴謂可

求奔趨冀超擢孰能脫卑汗特立等山嶽王子有高趣小節乃
儉樸當初入官時世事已先覺求閒計已違欲去意中確上章
乞養病堅臥從勘駁得請即挽車不顧雪泥濁故山啓巖扉絕
澗聆水樂閉戶還著書吾事在家學寒子忝末契久矣藉磨琢
相過雖不疎相別亦已數累日獨惘然念此歲月遡隨行誰我
畱所愧 聖恩渥終當躡遐蹤別手不重握

送允達後飲通法寺西軒

杯酒頻將別恨澆日斜酒盡却無聊獨嫌去客忙騎馬更欲尋
僧懶度橋小圃杏花春尚淺長溝流水意俱遙年華似與人相
約牆外鞦韆映柳條

陸贄方宅宴集分得鶯字韻

良會未云已不計杯酒行杯酒非所重重此鄉里情退朝入公

所職務各有縈歲首幸休暇于焉盡平生諧談接群彥參坐從
名卿衣冠既相合壺矢亦無爭今日更樂甚獻酬滿前楹東皇
況解事助以積雪清向夕却燈燭尊疊晃然明主人出新語四
座意俱傾失群慨歸鴻求友懷遷鶯未畢終日興更申來歲盟
清明日林亨大邀游興隆寺飯聽老房聰出永樂初姚
榮公與梁用行輩亦以是日游城南倡和四絕句見示
爲次韻

柳下行來過佛樓旋携越酒薦閩羞香車盡日如流水總向長
安陌上游

傍井循墻踏細塵椿芽蘭葉一時新杜陵亦是尋詩者隔水空
隣見麗人

詩卷曾留白下城北來燕地又清明憑誰更和襄陽曲七十餘

年共此情

圍碁擁矢各分明
繡佛垂堂晚獨登
社裏廬山隨處有
遠公今日是詩僧

原已玉汝栗夫過園居分韻得畫字

散吏如野人園居幸麤就
旋乞桃李栽疎籬幾枝透
莫嫌花蕊稀倚樹已堪嗅
入夏倘成陰還來坐清晝

予初登進士第時武靖侯趙公實奉詔待宴禮部公既
老病家居念舊爲四絕句見寄次韻答之

甲榜題名愧起家
賜來法酒勝官茶
元戎傳詔懷當日
許戴瓊林第一花

散吏蕭然自一家
渴心長愛玉川茶
曲江院裏重回首
翠幙春風隔杏花

連雲甲第列侯家坐上曾分舊賜茶
充國老來諸子壯戰袍重
見織團花

莫府功高早臥家囊收意以不思
茶華箋詩到行行整誰說臨
文老眼花

和趙武靖病中招飲二首

瓊林錫宴已多時想見褒公虎豹姿
今日春風過甲第馬頭飛
絮逐游絲

老將閒居不計年舊藏腰帶賜通天
頻婆樹底多詩興瘦句誰
誇賈浪僊

貞伯王汝原已携酒同過園居二首

門設荒園盡日開探春時枉故人來
盤中自愧無鮭菜墻下惟
誇有鵲槐願得常年供紙墨尚畱隙地
築亭臺羽家池上山公

醉馬背須看倒載回

石庭延客坐斜暉此際殘花亦緩飛新作園官非強授故衝詩
陣忽重圍晚晴霞彩浮高屋春冷風威入袂衣後日相過應上
巳野泉猶可拔除歸

王孟端墨竹為貞伯題二首

九龍山下竹千竿盡屬高人王孟端何處看來渾似此山堂疎
影落漪瀾

百年風致宛如新滿地清陰庇後人金母橋頭重問舍墨君堂
上舊傳神

送錢世恒御史出巡

峩冠誇憲史秉笏侍明廷奉使初乘傳寧親復過庭五雲違北
闕六月息南溟出郭人爭餞臨岐馬不停朱函藏手敕繡服映

腰鞞風送花填路沙隨水接汀才華張美錦意氣逼青堂萬里
前旌動光搖執法星

題趙子固畫蘭

王孫弄筆成墨數九畹依然連百畝開圖墨潘將誤拾撲袖香
風不勞艷破縑零落三百年非藉好事安能傳寸根無土強生
活鄭老後來真可憐

分韻得江南二字送貞伯二首

忽對春風南陌還思夜雨西窗高丘恨不千尺望見離人渡江
渺渺綠波芳草此時送別何堪潮到潯陽向上人歸鍾阜之南
送貞伯再分韻得舍字

宛然李公垂精悍真可詫譬彼千里駒骨相有定價維昔掌絲
綸朝回屢清暇考古如不及萬卷壓高架危言動
明主雅

意資 聖化去之十年餘尚復令人怕平生所交游往往至卿
亞形蹟又遺忘氣力豈憑藉名列揚王前身處季孟下又次仍
兵曹分司得車駕金陵佳麗地古句非假借秦淮匯霸漣鍾阜
鬱嵩華況此亦故鄉無勞買官舍所惜者吾徒臨別當首夏家
家競餞飲長日對尊罍安能叙中情坐語此短夜離懷逐江流
千里向南瀉

題海虞錢氏所藏王均章虞山圖

均章名珪號中陽老
人生元盛時年未四

十弃官歸隱虞山之下慕舟楫尤遠於醫所著有
泰定養生主論等書年餘九十而卒見吳思菴跋

扁舟昆湖去憶向虞山還當時迫日暮未得窮躋攀至今三短
章寂寥不重刪安知六載後依然見茲山諒無愚公愚賴有頑
僊頑頑僊隱居處深林置柴關丹竈火常伏藥闌苗載芟高情
付縑素丹青色斑斑茲山臥平野隱然不成環逶迤亦甚遠攢

蹙何其慳只尺見百里群峯互垂鬣飛鳥歸易沒浮雲出偏閒
拂水最奇麗空巖故漩深天風或稍定石壁仍潺潺僊宮對佛
寺妙境非人寰獨憐仲雍墓誰爲剪榛菅短棹載書卷浩歌水
雲間彷彿歸菴翁往來寶巖灣竊祿本無補乞身亦多艱臥游
畢舊願坐嘯開塵顏

送周仁廣通判福州

青衫烏帽去翩翩劇郡勞人信獨賢地下文襄宜有後江南凋
敝不如前濟民長策存家傳游宦初程接祖筵公道從來能自
薦三山風月謾相延

得賀美之書言吳民被災

書來吳下少浮沉入手猶疑得好音泉客美珠俄化血田家新
穀已剗心附毛却恨皮何在竭澤安知水不深肉食詞林無寸

補短吟聊復代官箴

題畫

水長鵝肥蕩口花飛鷺脰湖邊吳歌唱徹歸去日暮青山滿船

送沈仲律湖廣僉憲

江左才名自一家流傳詩法到京華乍來一月俄成帙更別三年定滿車赤墀巢危畱夜鶻洞庭波遠帶秋霞遙知使節登臨處訟牒稀時早散衙

曉過工部分司池上觀荷

匹馬城西趁早涼偶來池上見紅粧魚林近接浮雲影樹屋高撐漏日光翠柄依然搖白羽碧筒真可當清觴莫乘輕筏過南渚鷓鴣鷓鷀正滿塘

題厓山大忠祠四首

休指匡山弔戰場，忠魂久已過錢塘。
三仁可少文丞相，一死如前李侍郎。
毒霧漲天橫沍氣，落星浮海散寒芒。
孤墳最是無抔土，新廟依然有瓣香。

颶母誰懷國事憂，回看夜壑已無舟。
山河滿地皆胡馬，潮汐常時自海艚。
空使讖書符四廣，不教宗社復東周。
孱兵到此誰非死，名姓紛紛惜未收。

獨上高丘望大洋，晚風吹淚濕衣裳。
何人忍耻修降表，當日臨危進講章。
島國全身惟叛相，潭州無事却勤王。
史家未識畱燕意，便把祥興繫宋亡。

厲階千古恨遼金，戮力終成國步侵。
鼎足一時撐海角，旄頭中夜到天心。
關豺虎魂空返，寂寞魚龍骨共沉。
臣節屢書猶不盡，欲將遺事託碑陰。

次韻陸鼎儀讀文信公指南集

柴市遺祠凜若生，艱危當日仗忠誠。
衣裁左衽慚相尚，纓結南冠死却榮。
正氣自勝牢獄困，颶風偏使乘輿驚。
從容取義真難事，淚落陳編此日情。

得原輝書云東庄兩桂樹甚茂

兩桂當年汝自栽，石庭一別手書開。
經行已訝枝相礙，愛護應勞土重培。
密處柝欄休剪去，常時鸚鵡每巢來。
香傳隔巷繁花落，欲趁秋風買棹回。

與諸友出城東散步水際

岸花汀草駐殘春，步逐漁郎更問津。
側足岡巒渾不畏，會心魚鳥自相親。
一灣已似江南意，半日都忘洛下身。
西出郭門勞僕馬，青山真是誤游人。

答雪屋上人

艤舟山足扣禪機
記得雲林啓半扉
靜夜香爐渾不冷
深秋書札未應稀
雪中老屋懷蒼藟
湖上長鑱負蕨薇
須信大顛詩律細
世人休更笑畱衣

長至日飲張兼素後府新齋

齋居清絕坐忘還
明月從渠照醉顏
自署何妨棋品下
相過不在酒杯間
段灰微動臺官識
羽檄稀來幙府閒
誰似當時張仲蔚
蒿萊滿地戶常關

濟之作共月菴有幸分海月菴中月之句因足成答之

幸分海月菴中月
此事流傳亦甚奇
隔屋絕勝千里共
可庭寧受一方虧
翛然步履歸深巷
聊復詩筒過短籬
報我澄波三萬頃
他年應宿太湖湄

再答

他年應宿太湖湄，獨許風流白傅知。
林屋千間真可住，畫船十隻也須移。
藏來左券言非戲，分過東墻事若癡。
後夜不如同醉賞，羽觴飛處兩無疑。

三答

羽觴飛處兩無疑，月過槐梢人去時。
齊相已忘求楚貢，晉人終肯救秦飢。
清輝全借渾非少，舊好重修幸不遲。
願得浮雲長散盡，家家簾幕與秋宜。

送劉職方時雍赴福建參政

早振詞林五色翰，廿年郎署忽彈冠。
校書劉向成新序，判事姚崇起夏官。
楚客不驚湖海濶，閩山能隔雪霜寒。
他時召伯甘棠樹，只是南風荔子丹。

祈雪齋宿

坐久窗間耿玉繩齋廬人靜黯殘燈常年樂事心偏向深夜憂
懷力未勝月色滿庭疑是雪河流沿岸想無冰校書劉向今如
在更欲相從論庶徵

次韻倪學士祈雪齋宿

玉河西畔路如迷雲霧濛濛萬木低三日偶成祈雪會一篇將
擬聚星題香凝斗帳清無寐地接公堂近可躋夜半攬衣人欲
起長廊月白誤寒鷄

哀李士英二首

逝矣平生恨獨賢同官今幾是同年詞林有一誰言少科甲惟

三我愧前弱息命名悲反席

士英沒前一日予往視之以其子託予命名

衆人談夢

悟乘船

士英初病夢入一舟中無限隔亦無通明處既沒衆始知其爲棺也

安能便作南遷客死

別吞聲重覽然

歲暮西街日景收馬頭殘淚憶交游朝班竝立常連肘仕路爭

趨每掉頭經解暫緣持藥廢士英熟於經學常力疾為諸生講解孝思猶作治棺

謀衆議治棺士英聞之曰吾先人客死於此因貧歛葬皆不如禮慎無於吾獨厚蕭條舊舍難重過春

到惟應卉木愁

觀盛舜臣所藏竹爐蓋倣惠山元僧之制其伯父侍郎

公銘其傍

聽松菴裏試名泉舊物曾將活火煎載讀銘文何更古偶觀規
制宛如前細筠信爾呈工巧暗浪從渠攪醉眠絕勝田家盛酒
罌百年長共子孫全

題畫四首

雲閣青山出松厓翠瀑流悠悠三步外為爾一回頭

漁舟凍不移況有樵斧響
占斷棗花灣甘爲五湖長
深塢閱清暉誰知有佳寺
惜哉挂帆人只愛江風利
清湍帶平岡誰使入毫素
老樹四五株結茅恨遲暮

匏翁家藏集卷第十一

匏翁家藏集卷第十二

詩四十五首

送馮佩之副使江西提學

天上朝辭玉陛行
杏花開處動雙旌
秋臺高薦皆公議
春榜重懸滿後生
江右儒風當復盛
越中文士莫相輕
長安門外期重見
爲報三年學政成

送賀澤民赴河南僉事

御史才名闕下知
外臺欲赴類分司
豸衣未敝何須改
螭墨當坳尚不移
南浦吟成芳草色
曲江過盡杏花時
諍臣自古關休戚
漢使行將召望之

謝孫希說送長鳴鷄

何物攤褫白錦毛
庭前解縛便長號
徒聞野鷺令人愛
未許蒼

蠅代爾勞技距群來如赴敵
我冠獨立自分曹
夜深風雨偏安枕
舖餒從今謝子教

送賀其厚迎其弟解元其榮喪南歸

臨別匆匆把客裳
愛君誰比四明狂
只從門外看扶柩
肯信詩中訊閱牆
諸子讀書應不廢
故人沿路定相將
明朝我更成寥落
西館塵生六尺牀

次韻施煥伯下第

禮闈難遣獨離群
老手春來最惜君
暫向長途聊弛擔
倘逢知己更論文
客樓高臥三竿日
禁闈遙瞻五色雲
爲語施雖宜少待
韋編終不負精勤

觀園翁種菜

園居無所營筋力
徒自強惜哉一畝地
愧爾三年荒
清晨老圃

至鋤治循東墻札札瓦礫除奚顧宿草傷墜土成數畦遂分界
與疆土爰布美種能風要深藏因感昔人語種植信有方園翁云深
種則耐風此漢趙過語也日夕度壠行依然自褰裳流泉俯可挹長溝設隄
防所恨天久旱井泥渾且黃安能足灌溉頗使萊甲長人力已
云至天時亦相妨緣知田野外黃沙正茫茫何如但肉食此勞
不須嘗

玉延亭成次韻王汝

偶栽山藥得佳名墻下幽亭一日成車馬勒回無俗士壺觴傾
倒盡平生升階脫履長頭近倚檻觀書老眼明此後來游誰復
障繞籬須爲惜殘英

又次韻李賓之

靈苗種後亭初築匠石園丁共玉成聊復棲遲稱小隱不應服

食學長生盤中便可少苜蓿階下休誇有決明欲向楮間乞題
字墨雲飛動看英英

次韻諸友王延亭聯句

樓高未許臥陳登聊結荒亭揖客升坐定園花紅雨斷望迷宮
樹綠雲層墻低漸覺簫聲近杯淺休嫌酒面澄願得畱詩成故
事西菴入夜更挑燈

飲王延亭喜雨

園門新設不曾關天意能供半日閒凍雨一番驚屋漏晴虹千
丈比橋彎墨翻荷葉詩人句紅綻榴花醉客顏賴有冷泉娛晚
酌籬根流出更潺潺

寄壽陳起東五十

束髮同游不出鄉廿年兩別費相望江山繞郭供詩筆歲月畱

人坐講堂紅顏也應誇獨好白鬚休更較誰長要知久客京華者壽域躋來已鴈行

賦園亭四物

凳

楹間設席坐來安橫木旁施當曲闌面面不妨閒徙倚曉涼疎雨最宜看

簞

槐花暗落雨聲中簞簞高撐兩翼同憶泛扁舟過木瀆青山緣岸正推蓬

屏

小紅疎翠不遮亭炎日西行藉紙屏陰雨暫時誰許撒更多游客要題名

橋

移得詩中丈八溝，雨餘新碧水初浮。
晚來客醉高眠處，莫訝孫郎不枕流。

送沈尚寶賀千秋節還南京

琅函遥捧望儀宸，六月樓船度海津。
早歲喜逢三日雨，好官閒避十年塵。
槐花滿種玄都觀，柳色重迎瑣闥人。
莫歎世情今尚在，南歸須爲問江神。

次韻沈時暘雨後過飲園亭兼懷李貞伯二首

農家苦久旱，嗷嗷三伏中。
異哉暑氣酷，宛與炎方同。
夜眠聞好雨，早起乘涼風。
吾亭適麤就，歡聲助園翁。
簿書懷杜老，笠屐來蘇公。
願從康衢民，擊壤歌時雍。
故人五年別，舉杯賀奇逢。
俯井挹澹泉，登臺眺危峰。
天高孤雲落，晚晴度冥鴻。

四海人亦多吾生交獨寡有時忽仰歎浩氣振屋瓦窮巷謝逢
迎荒園任疎野欲從獨樂翁往赴耆英社長日無所營新秋更
清暇雞黍不滿盤醴酒仍在罍却枉知友來冒雨獨騎馬因懷
西臺李去弔長沙賈封書白門邊弭節蒼梧下

貞伯官南京以公事出嘗有書

來云直至蒼梧而返

再次韻答時暘飲後見貽

散吏幸無事合置荒園中著書忘其詞安復論異同墻下麥垂
實颯然起秋風感時忽搔首五十真衰翁投牒愧一出束帶隨
三公晨趨揖東閣夜夢游南雍鄉使來吳下入門偶相逢中懷
不能語倚壁如頽峰南飛孰可繫仰見青天鴻

淙淙簷溜垂此事久亦寡移書防漏濕矮屋初墮瓦久旱雨固
好墊溺念郊野况復南樓人百步隔詩社清池下幽禽坐對共

閒暇妙墨尚在函濁醪復盈罍持此欲就之泥深沒羸馬踈慵
幸免朝早謝鳳池賈風低碧篠叢最悵望西窗下

喜原輝弟至京

時五月二日

遠道親携藥裹來當留下馬拂黃埃不驚舊日形容改猶記前
宵夢寐回出巷親朋宜漸訪上牀兒子欲相陪平生四海尤憐
汝得向窗間笑口開

大雨坐海月菴

即看池面水平橋旋覺孤亭勢欲漂老父得魚過別市誰家移
竹趁明朝四陵下馬應難避

特世賢陪
祀山陵

北巷將書莫見招

玉汝
招飲

吾弟遠來能慰我彭城今夜憶逍遙

玉汝以予辭不赴次韻再約來日復和辭之

道上蹄涔接板橋詩筒將去却愁漂縱橫燕市雲為雨彷彿巫

山暮復朝半舫若浮宜自繫尺書仍至故相招泥深我僕難忘
蹶莫使前瞻馬尾遙

王汝復次韻來速乃許赴再和答之

佳時已過鵲成橋菰米榆錢忽亂漂明月避人應此夜烈風欺
客更崇朝須知木屐平生着敢負皮冠舊日招終勝李侯躡馬
背披蓑兀兀路遙遙

赴飲後夜坐對月復次韻

誰從天上作飛橋萬里端愁月浪漂一兩步來非卜夜五更起
坐不論朝水浮北巷深宜揭人隔西河近可招後會共期秋半
勝三旬屈指尚嫌遙

次韻朱天昭戒飲

早覺平生一事非枯喉涓滴到應微舊傳丙吉車茵汚今見陳

導井轄稀三爵不妨從監史百壺真念隔庭幃却愁孤館當寒
夜禦冷憑誰製寢衣

次韻濟之謝送決明

畦間香霧正氤氳童子清晨荷鍾勤不惜離披垂翠羽端愁搖
動落黃雲藥名早得宣公註書帶休從鄭老分病目向來俱有
賴涼風吹汝莫紛紛

次韻時暘對雨喜晴二首

颯颯復霏霏清晨坐掩扉短籬垂豆角破壁上苔衣潤覺琴聲
緩涼驚酒力微客樓詩句滿未許沈郎肥

斷虹連返照向晚喜新晴遠市浮埃盡長溝積水清歌謔童子
事刈穫野人情身在幽燕地無勞賦北征

送原已赴南京院判

晨趨入禁闈夜夢游鄉關屢見高堂人宛然兩眉鬢憂來心如
割歸計何其難終感 聖恩渥不為臣情慳南都許便養簡
任非投閒十年積憂懷一朝變歡顏而我復助喜安能復畱攀
初冬入吳境遠見陽華山舟中坐念之豈亦夢寐間里巷爭歎
息樂哉此南還

題啓南寫游虎丘圖

啓南初游靈巖遇雨明日既霽乃與海虞周景新游虎丘因寫此圖

并有詩記其事李貞伯云是日亦在陽山遇雨而歸陳永之謂雨霽日獨以事在陽抱山恨不能與啓南同樂也皆有詩題其上

景新寄予和之

雲巖不減靈巖好

虎丘又名雲巖

作者胡為涉行潦千人石上兩青鞵

日出深林歌杲杲一時取樂能償勞水西山北爭探討澗泉漱

齒心亦清石壁題名手親掃西去陽山十里遙冒雨有人歸不

早明朝見話入雲巖扼擊捋須空懊惱好山不趁晴時游此事

已差何足道安知猶有獨游人隔水相望在陽抱何處移來此
畫圖我方起觀俄絕倒詩情畫意各有在歲月依然仍可考虫
雞得失不須爭泡影死生難自保永歿再到京華住六年匏翁
頭顱欲全皓江南歸計有時成次第山行非草草臥游且把畫
圖開鶴澗松菴亦天造翻嫌二客不能從回望周郎與東老

送張宗茂道紀南還

身隱吳門五十年玉京來往只翛然東華塵土霞裳外北斗光
芒寶劍前猶喜山林通雨露亦知官府足神僊廳車又逐天風
轉俯視千艘滯海壖

賦酒榼慶周菊處七十

無稜非觚有蓋如甕重或可以挈空不可以送是名曰榼人所
常用維榼之腹容酒百斛維榼之口出酒千斗酒旨且多洋洋

如河汝不化烏有我肯游無何飲之既醉拍手歌酒數行歌未
已笑鴟夷老無齒一生只呷三江水不如吾常隱吳市閒與主
人較年紀賀客上堂連坐滿榻凭彼藥囊賦此酒盃

送張兼素出知施宗州

歲暮移家赴遠州南行誰復爲身謀一章之死無他悔六詔平
生亦勝游科甲翻令吾董重史編應向古人求都門持此聊相
贈不惜寒風透敝裘

分題豐樂亭送文宗儒太僕

何處亭成樂歲豐瑯琊山在亂雲中西南林壑誇尤美六一文
詞信獨工幽谷泉鳴琴操古石屏路轉酒船通幸當歸馬滁陽
日此地來游興不空

送原輝南還 九月二日

清秋欲盡向南旋別淚何堪重泫然吾已行年當五十汝今歸
路又三千亦知禁酒勝良藥好為修書附便船舊業東城勞暮
理相期歲晚在園田

原輝行後晚坐有懷

東望秋雲壓柁樓晚來水宿定通州却愁細雨行裝濕還恨深
溝送騎畱臨別題詩偏覺嬾坐來呼酒不忘憂惟應後夜生新
月兩地悠悠照白頭

冬至謁陵八首

出土城

馬上衝寒出北門豁然平曠識乾坤地連周圍民猶小天作燕
山勢獨尊看月未忘黃土寺往歲嘗宿寺中披煙仍見白浮村百官令
節長來此籩豆如流總駿奔

度沙河

橋下流澌玉一灣六年重此照衰顏疎林小店行厨到落日平原獵騎還韋杜南連多白草居庸北距盡蒼山天寒喜報王師轉驛路無塵羽檄閒

望昌平

脫轡能凌千丈岡解裘還耐北風涼迢迢古轍餘秋水漠漠平時又早霜日隱峰巒天易暝樹連城郭路何長孤雲飛處梁公廟猶似當時望太行

入昌平學舍

繞簷蒼翠數峰齊倦坐空堂意已躋高處川原渾歷歷晡時風日稍淒淒行來假館先思睡詩就還家各有齋首着滿盤供飯足坡翁休愛搗香糝

題劉諫議祠

凜然毛髮萬言危
歎息名賢遠莫追
甘露翻成他日變
清流寧受北司嗤
古人爲鑑無如子
後輩登科又屬誰
深夜高眠頻夢見
孤峰殘月照新祠

門傍高槐向晚開
忠魂長繞故鄉來
諸生入學供蘋藻
使者停車治草萊
展卷不平新史贊
贈官空繫後人哀
千年遺恨應難盡
誰念唐家有禍胎

入西陵

句裏青山笑復來
畫屏真愛四圍開
南循古路凡千折
西上高陵第一回

前此陪祀俱東陵

賦雪不勞重授簡
書雲還擬更登臺
天潢亂躡支機石
謾說昆明有劫灰

出昌平

晴旭熏人屬仲冬
笏簷誰識煖如烘
冰花細結重溪石
天籟遙傳萬壑松
此日清酣除酒禁
諸公太瘦帶詩容
來春暑茗應非晚
最愛池泉歎九龍

爲白郎中題荷花鵝圖

前朝畫學人如市
不獨丹青競山水
點朱塗粉擅寫生
花鳥紛紛總良史
趙昌名與黃筌齊
後來更稱崔子西
御府收藏三百軸
未數溪鷗兼野雞
丈縑如冰筆如刷
似向崔家傳妙訣
晴窗信手恣臨模
水面鵝成亦精絕
群魚出游意不閒
一躍欲過疎柳灣
翠荇蕩搖金掌底
雪毛灑落清波間
晚涼莫把荷花摘
回首驚猜還歛蹟
紅衣翠蓋錦雲稠
此物爲爾增顏色
戶曹何從購得來
公退閉門時展開
城南矮屋撐欲破
家人一笑皆云哈
世間妙筆真難致
持去莫教成故事
試看書罷便籠回
只換羲

家藏集卷十二
之五千字想公聞此當撚鬚秋風高興非尊鱸養鵝老向江南
住須是結茅臨瀟湖

匏翁家藏集卷第十二